

Rollup Banner Hat pela Prais
EM BAI STAP INAP MUN JUN 30 DEI LON 2016 OH INAP STOK LAS

K440 inc. GST
WANPELA SAIT

K825 inc. GST
TUPELA SAIT



Only at...
Waigani Drive, POM
Ph:313 9800
sales@theodist.com.pg
Markham Road, LAE
Ph:472 5488
saleslae@theodist.com.pg



- RAIT STAIL WANTAIM BIKPELA BASE
- OLGETA KALA WANTAIM NAMEL GLOS PRIN
- DISAIN SEVIS ISTAP.

Hela pipel i stap haus kra bilong namba wan pikinini man na tru-pela lida...



P14 na 15

Hela pipel laikim LNG mani



Pari Praimeru Skul long Pot Mosbi Saut Ilektoret, em i namba 4 skul insait long Nesanel Kapital long kisim ol sumatin na tisa skul kit i kam long Treid Pasifik. Hia wanpela gret 3 sumatin i sainim nem bilong em long wanpela rekot pepa we tisa bai holim insait long klasrum. Papa bilong em i redi tu long sainim nem long hap we em i tok long papa na mama bai sain. Stori stap long pes 7 insait long dispela isu. *Poto: Frieda Sila Kana*

OL papagraun bilong PNG LNG Projek long Hela Provins i laikim Nesanel Gavman long givim ol mani na arapela ol sevis ol inap long kisim long taim yet long PNG LNG Projek.

Ol i tok ol bai no inap larim bodi bilong leit Hela Gavana Anderson Agiru i lusim Pot Mosbi na go long Tari sapos Nesanel Gavman i les long harim singaut bilong ol.

Memba bilong Koroba-Lake Kopiago, Philip Undialu, i tok ol manmeri Hela i

laikim gavman long givim olgeta mani na arapela ol komitmen gavman i bin tok long givim taim ol i bin sainim agrimen bilong PNG LNG Projek.

Mista Undialu i go pas long haus kra bilong leit Hela Gavana Anderson Agiru, na em i bin go long Tari long tokim ol manmeri long ples long olsem wanem Hela Provinsal Gavman i wok long stretim ol samting long kisim bodi bilong leit Agiru i go antap long Tari.

Em i bin go long Tari wantaim Hela

Provinsal administreta William Bando long tokim ol pipel bilong Hela long ol samting ol lida i mekim long kisim bodi bilong leit Agiru i go na planim long Hela.

Tasol ol pipel i tok larim bodi bilong lida bilong ol i stap yet long Pot Mosbi. Ol i laikim gavman long baim ol pas-taim na bihain bodi bilong leit Agiru i ken go long Tari.

Long Tunde, Mista Undialu i kambek nating long Pot Mosbi na em i tok ol Hela pipel i givim wanpela petisen

long Nesanel Gavman.

Dispela petisen i gat 8-pela poin o as tingting long askim gavman wai ol i laikim dispela mani bilong LNG na arapela ol mani na sevis gavman i bin tok promis long givim i go long Hela pipel.

Wanpela bisnis man long Hela, Alex Matiabe, i givim dispela petisen i go long Mista Undialu na Mista Bando, na tokim tupela long givim i go long Praim Minista Peter O'Neill.

I go moa long pes 4...



BOOK ONLINE ANYTIME ANYWHERE

BOOK ONLINE NOW & PAY LATER

within 48 hours at your nearest Air Niugini Sales Office.

Call Toll Free on 180 3444 or contact your nearest Air Niugini Travel Centre or Travel Agent.

Air Niugini
www.airniugini.com.pg

K40,000 Win Moni

wanwan long 4pla
laki lain bai winim
K10,000
Sekim hau long joinim
resis insait long ol
stoa mipla makim



Agiru i dai olsem turangu man

BIKPELA brata bilong leit Gavana bilong Hela, Anderson Agiru, i tok brata bilong em i dai olsem wanpela turangu man.

Vincent Agiru i tok leit Anderson i no dai olsem wanpela milenia man o wanpela biksot tasol em i dai olsem wanpela turangu man bikos em i no gat wanpela samting.

“Em i no gat haus. Em i no gat wanpela samting. Mipela i no kisim wanpela samting long nem bilong em tu,” Vincent i tok.

Vincent i askim ol wanlain bilong em na arapela ol pipel

bilong Hela long no ken mekim trabel o statim sampela pasin no gut long nem bilong Gavana Agiru.

“Yumi lusim politiks long sait. Nau yumi mas sanap wantaim long pasin yuniti na selebretim laip bilong leit gavana bilong yumi.

“Gavana Agiru i no save laikim pait na trabel. Em i wanpela lida, husat i save skelim ol samting gut long tingting na man bilong bringim bel isi.

“Papa God i bin givim dispela lida long pipel bilong Hela, Sauten Hailans na PNG. Nau em i taim we Papa God yet i kisim em gen.

“Mi laik askim ol wanlain bilong mi long no ken mekim trabel o pait. Yumi mas tap isi na sanap wantaim long holim haus kra i bilong lida bilong yumi.

“Mi laik tok tenkyu long olgeta pipel bilong Hela i kam stap wantaim yumi long dispela haus kra i. Yumi mas soim gutpela pasin na kamapim bel isi,” Vincent i tok.

Em i mekim dispela toktok las wik Fraide na Sarere long Sir John Guise Stadium, Pot Mosbi we ol Hela na Sauten Hailans komyuniti i bin holim pablik haus kra i.

Sir Peter tok tenkyu

GAVANA bilong Enga, Sir Peter Ipatas i tok tenkyu long leit Gavana bilong Hela, Anderson Agiru, i bin mekim planti gutpela samting long helpim developmen bilong Enga Provins.

Sir Peter i bin mekim dispela toktok long las wik Sarere long Pot Mosbi taim Hela komyuniti long Pot Mosbi i bin bung wantaim ol manmeri Sauten Hailans na arapela poroman bilong leit Gavana Agiru long haus kra i bilong em long Sir John Guise Stadium.

Sir Peter i tok leit Gavana Agiru i bin helpim em long kirapim ol skul

long Enga Provins.

“Enga Tisas Kolis i bin kamap bikos long helpim bilong brata bilong mi, leit Agiru. Olsem na dispela skul i gat wanpela haus, nem bilong em i Agiru blok.

“Em i bin helpim mi mekim Enga Skul ov Nesing. Hela Opena Teknikel Skul tu i kamap long nem bilong em.

“Mista Agiru i bin stap olsem brata tru bilong mi. Mi save go long em na kisim ol edvais toktok. Mi save stap wantaim em kl-sotu tru olsem brata bilong me.

“Mi bin stap klostu wantaim em kl-sotu long

20 krismas nau. Mi bin lainim planti gutpela samting long lidasip long em.

“Mi laik salensim ol pipel bilong Hela long sanap wantaim long dispela taim bilong sori. Mipela ol brata na susa bilong yupela long Enga i stap wantaim yupela,” Sir Peter i tok.

Sir Peter i bin kam long haus kra i wantaim pas-taim meri bilong leit Agiru, Cathy Kakaraya.

Papa bilong Cathy na bipo Memba bilong Wapenamanda, Sir Pato Kakaraya tu i bin kam wantaim ol long haus kra i.

O'Neill salim tok sori long Hela Gavana i dai

PRAIM Minista Peter O'Neill i bin kirap nogut long harim olsem namba wan pikinini man na trupela lida bilong Hela na Sauten Hailans manmer i dai long Pot Mosbi.

Leit Anderson Pawa Agiru i bin kisim sik long kidni bilong em na dai long las wik Fonde long Pasifik Intanesenel Haus Sik (PIH) long Pot Mosbi.

“Mi harim nius olsem Gavana Anderson Agiru i dai na mi sori tru.

“Long makim maus

bilong pipel na gavman bilong PNG, mi salim tok sori i go long famili na ol pipel bilong Hela Provins.

“Gavana Agiru i save putim pipel bilong Hela i go pas na i bin sevim gut ol pipel bilong Hela na Sauten Hailans.

“Em i bin kamapim strongpela lidasip long kirapim PNG LNG Projek we kantri bilong yumi bai kisim bikipela benefit na ol pikinini bilong yumi long bihain taim bai lukim planti gutpela samting i

kamap long dispela projek.

“Long ol laspela taim bilong em, leit Anderson Agiru i bin sevim pipel bilong Hela olsem gavana.

“Klostu taim tasol, leit Agiru i bin bungim sampela ol hevi long politiks sait tasol em i bin sanap strong na holim wok bilong em.

“Long politikel laip bilong em, leit Agiru i bin bungim planti hevi na ol arapela samting no gut tasol em i bin sanap strong na abrusim ol

kain kain hevi.

“Leit Gavana Agiru i bin strongim sait long pait egensim sik taim em i bin painim sik long kidni biong em.

“Em i bin pait egensim dispela sik, wankain olsem em i save sanap strong long politiks, tasol sik i daunim em na em i lusim yumi olgeta.

“Papa God i ken givim malolo long leit Agiru na givim gutpela bel isi long famili na wan lain bilong em,” Mista O'Neill i tok.

Leit Agiru bin baim namba wan 'big rooster' bilong Marape

FAINENS Minista James Marape i tok em i no bin save long politiks tasol leit Gavana Anderson Agiru i bin lainim em long pasin bilong politiks long PNG.

Mista Marape, husat i Memba bilong Tari-Pori, i tok em i bin kamap wanpela sapota bilong leit Agiru taim em i laik sanap long politiks bikos em i bin lainim planti samting long Agiru.

“Yumi olgeta i save long kaikai Big Rooster. Long laip bilong mi, leit Agiru i bin baim namba wan Big Rooster lans pek taim mi bin kam long skul long UPNG

long yia 1990.

“Agiru na bipo meri bilong em, Cathy Kakaraya, i bin gat wanpela kar, na tupela i save kam painim mi long yuni.

“Dispela taim i no gat planti manmeri Hela i stap long Pot Mosbi. Wan wan man tasol i save gat kar na Agiru i bin gat wanpela kar.

“Taim mi bin pinisim skul long Kabiufa Hai Skul na kam long UPNG, leit Agiru wantaim Cathy i bin kam painim mi long UPNG.

“Mipela i bin stap wantaim na leit Agiru i bin lainim mi long planti

gutpela samting long laip. Em i bin tokim mi long sanap strong long pablik, opim mau na toktok.

“Mi bin sanap wantaim em na sapotim ol ileksen bilong em i kam inap em i dai. Mi sori tru long Hela i lusim wanpela gutpela lida.

“Long dispela taim bilong sori, mi laik makim maus bilong pipel bilong Tari-Pori, na famili bilong mi, na salim tok sori i go long Hela pipel na long ol famili na wan lain bilong leit lida bilong mi,” Mista Marape i tok.

Everyone is a winner on the friendlier network

Buy and activate a new SIM and get a **FREE Day Pass**.

5 mins voice Any network in PNG

5 sms Any network in PNG

K5 tasol Dial 1250 to activate SIM

prepaid

bmobile | vodafone

76003555 or 1555
connect@bmobile.com.pg
www.bmobile.com.pg

LIMITED PERIOD OFFER

Ol gavman long Pasifik mas helpim midia



NAU em i taim bilong yumi selebretim Wol Pres Fridom De long De 3 bilong mun Me, 2016, na Pasifik Ailan Nius Asosiesen (PINA) i laik mekim singaut long olgeta gavman long ol Pasifik kantri long givim ol yet long developim gutpela save long wok bilong midia insait long rijon.

Bikpela toktok bilong dispela yia em, "Rot bilong kisim Tok save na Fridom em i bikpela samting. Em i Rait bilong yu". Em i mekim yumi long tingting long ol rot bilong kisim ol toksave em i rait bilong ol pipel na ol gavman i mas kamapim ol dispela rot long ol sitisen na midia tu.

I no longtaim i go pinis, sampela samting we i kamap long Tonga i soim olsem sampela gavman long Pasifik i no laik long luksave long fridom bilong tokaut na

ol i wok long pasim ol bikpela toksave long ol midia. Mipela i laik toksave gen long ol gavman olsem ol i mas bihainim gutpela pasin bilong gutpela gavanens, transparensi na lo na rispekim rait bilong midia long wok fri tasol.

Stori bilong Tonga em i gutpela long harim bikos em i soim wanpela Praim Minista husat i save go pas tru olsem sempion bilong demokresi, fri spis, fridom bilong toktok na fri midia. Ol tok pret ol i mekim long ol senia Tonga Brodkas Komisen opisa na pasin nogut ol mekim em i no gutpela long wanem em i brukim rait bilong midia.

PINA i laikim ol gavman i mas sapotim wok bilong ol midia indastri, ol memba bilong ol long kamapim ol gavanens straksa bilong nesenel midia bilong ol.

Planti kantri long rijon i lukim ol nesenel midia asosiesen na ol kaunsil bilong ol i pundaun bihain long ol i kisim bikpela presa long gavman na tu, long presa bilong ranim bisnis wantaim strong bilong ol yet.

Em i taim nau long ol gavman i stat long putim ol pablik mani i go long helpim wok bilong ol nesenel midia asosiesen. Yumi save olsem ol Midia i makim maus bilong sosaiti, olsem na em i stret long gavman i mas sapotim wok bilong kirapim ol Nesenel Midia Asosiesen long wokim profesenel tren-ting developmen bilong ol midia wokman na wokmeri, long apim standet bilong wei bilong ripotim ol nius insait long Pasifik rijon.

Long Me 3 olgeta yia, yumi save kam bung wantaim long tokaut long Midia

Fridom na long tingim ol wokman na wokmeri insait long midia indastri husat i bin lusim laip bikos long presa i kam long gavman na long sosaiti we ol i stap insait long en.

Wanpela ripot i kamap long ol Ripota i no gat Mak, i tok olsem i gat 110 jenelis o nius ripota husat ol man i bin kilim long wol long yia 2015, na 787 olgeta stat long yia 2005 i kam taim ol stap mekim wok bilong ol yet.

Ol Ripot i no Gat Mak i putim ol kantri olsem Iraq, Syria na France olsem ol ples bilong bikpela birua long ol jenelis long yia 2015.

Pasin bilong pasim wok bilong midia long Pasifik i no kam long dispela kain mak, tasol em i gutpeal long yumi no ken wet inap kain hevi olsem i kamap na bihain yumi laik stretim.

PNG midia i mas fri long tokaut

LONG makim Wol Pres Fridom De long Tunde Me 3, 2016, Presiden bilong Midia Kaunsil long Papua Niugini (MCPNG), Alexander Rheeney i mekim wanpela singaut i go long ol gavman institusien na ol wan, wan man na meri long rispekim wok bilong midia long kantri.

Mista Rheeney tok ol nius ripota i mas stap fri long mekim wok bilong ol long kisim nius na tokaut long midia na ol i no ken gat pret long wanpela man o meri.

MCPNG i mekim luksave long en Wol Pres Fridom De, bilong tingting long wok bilong midia na long tingim na luksave long sampela wokman na wokmeri bilong midia husat i bin lusim laip long han bilong ol birua, taim ol i mekim wok bilong ol i stap.

MCPNG i wari long kain pasin we i wok long kamap long kantri nau we ol gavman institusien na ol pablik opisa i pasim rot bilong midia

long tokaut long ol samting i wok long kamap we i putim laip bilong ol pipel long birua na bagarap.

I no longtaim i go pinis sampela lain i bin sarapim na pasim rot bilong ol jenelis long ol i no ken kisim nius bilong sampela bikpela samting i kamap we i gutpela long ol pipel i save long en.

Sampela pasin we MCPNG i no amamas long en em olsem; long mun Epril, sampela lain bilong Royol PNG Konstabuleri wantaim wanpela deputi komisina i bin singaut bikmaus long ol lain jenelis na tokim ol long lusim hap bilong Nesenel Frod na Enti Korapsen Dairektoret (NFACD) long Konedobu, na long wankain mun yet, bikman bilong polis i singaut long RPNGC long askim em sampela kwesten long wanpela toktok em i salim long fon teks i go long wanpela het bilong gaman ejensi, na long Epril 28, 2016 ol sampela lain

i bin pasim rot bilong ol nius ripota bilong Post-Courier long go insait long Yunivesiti bilong Papua Niugini (UPNG) long kisim nius bilong ol sumatin husat i no go long klas bikos ol i no laikim wei gavman i mekim wok, na long Epril 30, 2016, ol sumatin lida bilong UPNG i givim toksave long Post-Courier, National na EMTV long ol i no ken kisim nius bilong ol sumatin i les long go long klas.

MCPNG i tok, ol dispela kain pasin i soim wanpela kain rot olsem ol pablik na ol praiwet sitisen i laik wok hait tasol, maski ol i wok long ol pablik opis we ol i mas stap long ai bilong ol pipel.

"Ol polisman em ol opisa bilong lukautim lo na long wok bilong ol long bringim jastis tu i mas stap ples klia long ol pablik na midia wantaim long olgeta Papua Niugini i mas save," Mista Rheeney i tok.

"Na pasin we ol polisman i

wokim long traime na askim wanpela ripota long opis bilong ol, em i no stret. Em i tru olsem ol midia ogenaisesen i no laik long pasim rot bilong ol polis long wok painimaut bilong ol long ol man i brukim lo.

Tasol sapos ol i laik toktok wantaim wanpela ripota, ol i mas singautim em wantaim bos bilong em long go long toktok. Na dispela miting i mas kamap long ai bilong sampela witness, olsem kampani loiya," Mista Rheeney i tok.

Mista Rheeney i mekim tokTaim ol sumatin i pasin rot bilong ol nius lain, em ol sumatin i pasim rot bilong ol yet long ol pipel inap long harim wanem kain gutpela wok ol i mekim. Midia inap long kamapim moa luksave long bel hevi na wari bilong ol na soim lekmak bilong ol long kantri.

Em i tok long ol sumatin i mas save olsem 100,000 manmeri i

save ritim tupela bikpela niuspepa long wan, wan de, na sampela milien pipel i save lukim EMTV nius. Na sapos ol i larim ol dispela midia lain i go insait na kisim piksa na stori bilong ol, em bai helpim tru wok bilong ol.

Makim maus bilong midia, Mista Rheeney i tok olsem sapos ol pipel i ting olsem wanpela nius ejensi i wokim wansait ripot long midia, em i gutpela long ol i mas bringim belhevi bilong ol i go long Midia Kaunsil na Kausil bai toktok wantaim wanem midia ogenaisesen i mekim dispela asua.

Na long wankain taim, Wol Pres Fridom De we ol Jenelisim skul long UPNG i bin redim long holim long Tunde Me 3, 2016, i no bin kamap bikos long ol sumatin i stopim ol klas long kamap na olgeta wokman na wokmeri long yunivesiti edministresen i bin lusim opis na go bek.

We have knowledge, history, experience and a commitment to PNG like no other financial institution.
 We share a common bond - our culture, our community, our people.
 Knowing that united we will be successful. Wherever you live, we know you, and we are there for you. After all PNG is our home – We are PNG, We are you.

LIVIKONIMO KOKI
 BSP GOROKA BRANCH MANAGER
 20 Years with BSP Bank

WE ARE BSP

www.bsp.com.pg

Hela pipel laikim LNG mani

I kam long pes 1

Mista Matiabe i tok Hela bai no inap painim hariap wanpela man olsem leit Agiru, husat i fit long toktok long nesanel na intanesanel level.

Em i tok ol pipel i laik kisim bodi bilong leit Agiru wantaim gutpela bekim bilong dispela petisen i kam long gavman.

Tasol sampela ol manmeri Hela i no wanbel long dispela kain pasin bilong ol papagraun long yusim dai bodi bilong lida bilong Hela na PNG long askim ol samting bilong LNG.

Sampela ol manmeri Hela yet i tok i no olgeta manmeri Hela i papagraun. Sampela ol i no save kisim benefit na mani i kam long LNG Projek.

Ol i belhat long ol papagraun na i no wanbel bikos ol papagraun i no givim rispek long lida bilong ol.

“Ol papagraun i save kisim mani. Las taim tasol ol i kisim K53 milien bisnis developmen gren. Ol i save pinisim mani long bia, meri na hotel.

“Ol i no ken yusim dai bodi bilong lida bilong mipela long askim gen mani long gavman. Ol i mas rispekim leit Agiru, na larim ol i planim em na em i malolo.”

Manmeri laikim Wantok Niuspepa long Kutubu

NAMBA wan niuspepa bilong yumi ol PNG stret, Wantok Niuspepa, i kamap wanpela gutpela poroman bilong ol manmeri Moro na Lake Kutubu eria long Sauten Hailans.

Ejent bilong Wantok Niuspepa long Moro em i Elizah Yore, husat i wanpela komyuniti lida long ples. Mista Yore i bin kamap sels ejent bilong Wantok Niuspepa stat long las yia Desemba.

Em i tok ol manmeri Kutubu nau wok long poromanim dispela Tok Pisin niuspepa.

“Mipela i amamas long Wantok Niuspepa i wok long bringim ol nius na stori i kamap long PNG na long arapela ol ples long wol.

“Maski bikipela oil na ges projek bilong kantri i kamap long Kutubu, ol manmeri i stap turangu yet.

“Mipela i no save mani i wok long go long we. Taim mipela i lukim Wantok Niuspepa i



Elizah Yore em i Wantok Niuspepa ejent long Moro na Kutubua eria.

ranim ol stori na sampela gutpela piksa, mipela ol pipel long Kutubu i wok long tingting planti.

“Wanem taim bai mipela i

gat gutpela kolta rot. 23 krismas i go pinis na manmeri i wok long slip long haus sak sak yet.

“No gat wara saplai. No gat

pawa lait, no gat TV na no gat wanpela gutpela samting i kamap.

“Mi singaut strong long ol lida Foe lida na gavman long lukluk long rot na arapela ol besik sevis long helpim pipel,” Mista Yore i tok.

Mista Yore em i wanpela dairekta bilong Foe Segmen 4 Pailplain Lenona Asosiesen. Em i mekim dispela toktok olsem wanpela lenona lida insait long Foe papagraun bilong Kutubu oil projek.

Mista Yore i salim tok sori bilong am na ol pipel bilong Foe i go long ol famili, wanlain, na ol pipel bilong Hela, husat i lusim leit Gavana Anderson Agiru.

“Mi makim maus bilong ol pipel bilong mi long ples long Kutubu na salim tok sori i go long ol lain bilong mipela long Hela.

“Mipela ol pipel long Kutubu i sanap wantaim yupela long dispela taim no gut,” Mista Yore i tok.

Gavana Jeneral amamas long Presiden bilong India i kam raun

GAVANA Jeneral Gren Sif Sir Michael Ogio i bin bungim Presiden bilong India H.E. Shri Pranab Mukherjee long Gavman Haus las wik Fonde.

Presiden Mukherjee i bin kam raun long PNG long strongim wok poroman namel long India na PNG. Dispela em i bin namba wan raun bilong wanpela het ov stet bilong India long kam raun long PNG.

Taim Gren Sif Ogio i laik tok welkam long Pres-

iden Mukherjee, em i tok dispela raun bilong presiden i makim gutpela poroman tupela kantri i gat. President Mukherjee i tok dispela raun bilong em bai putim poroman bilong India na PNG i go antap long narapela level.

“Mi luksave long laik bilong PNG long kirapim ikonimi. Edukesen na kirapim save

manmeri long PNG em i wanpela bikipela samting.

“Teknologi em i wanpela samting we India i redi long kisim i kam long PNG na helpim PNG,” Presiden Mukherjee i tok.

Em i tok histori bilong PNG na India em i wankain, we Ingran i bin lukautim tupela kantri wantaim na kisim ol risos bilong tu-

pela, tasol tupela kantri i gat gutpela poroman long lainim planti nupela samting na skelim ekspirens bilong tupela long kirapim kantri.

Presiden Mukherjee i bin kam raun long PNG long las wik Fonde na Fraide. Long Fraide nait em lusim PNG na go raun long Nu Silan.



Presiden Mukherjee i sekan wantaim Difens Minista Dokta Fabian Pok long Jacksons ples balus, Pot Mosbi, long las wik Fonde taim bikipela balus bilong India i lusim em.



Wanpela sikman long Bamu Rurel LLG, long Midel Flai Distrik, Westen Provins we Medikal na Trening tim bilong YWAM Medikal sip MV YWAM PNG i helpim em antap long sip, pastaim long helkopta i kisim em i go long Daru haus sik. Moa stori long pes 8. (Foto: YWAM Midia.)

Endoscopy: A Minimally Invasive Diagnostic tool, now in PNG

Endoscopy is a medical marvel that has brought about a revolution in diagnosis and surgical treatments, offering both doctors and patients a hassle-free disease management option. In today's changing arena of healthcare, PIH is always working to keep up with the latest in medicine to meet the healthcare needs of people in PNG. At PIH you can find the modern, state-of-the-art Endoscopy unit, which is one-of-its-kind in entire PNG. We are staffed by Board-Certified Gastroenterologists, General Surgeons, highly-trained and experienced physicians who have received special training in conducting endoscopic procedures. Endoscopic procedures are increasingly becoming popular because of its nonsurgical methods, safety, effectiveness and affordability.

Your surgeon can insert the endoscope through natural openings like mouth or anus. Images of the inside of your body are relayed to a monitor, seeing which the doctor can make accurate diagnosis and may also treat the condition.

An endoscopy is usually not painful, but can be uncomfortable, so a local anaesthetic or sedative may be given to help you relax.

A diagrammatic representation of Endoscopy process

The endoscope is carefully inserted exactly to the part of the body being examined. It will usually be performed on an outpatient basis, which means you will not have to stay in hospital. Endoscopy is performed by highly skilled and experienced surgeons who use advanced technology for the safest and most optimal outcome. An endoscopy can be used to examine any area of the body if symptoms suggest a problem.

Types of Endoscopy



Some of the most commonly used types of endoscopes include:

- Colonoscopes – used to examine your large intestine (colon)
- Gastrosopes – used to examine your oesophagus and stomach
- Endoscopic retrograde cholangiopancreatography (ERCP) – used to check for gallstones
- Broncscopes – used to examine your lungs and airways
- Arthroscopes – used to examine the joints
- Hysteroscopes – used to examine the womb (uterus) in woman
- Cystoscopes – used to examine the bladder

Endoscopy is used to evaluate and even treat these underlying conditions:

- Pre-malignant conditions
- Difficulty or pain when swallowing (dysphagia)
- Persistent abdominal pain

Chest pain that is not caused by heart-related conditions

Constant nausea and vomiting or vomiting blood

- Unexplained weight loss
- Persistent diarrhoea or blood in stool
- Taking biopsies
- Retrieval of foreign objects
- Joint Pains

Endoscopy offers many benefits



Is simpler and with reduced risk
Diagnosis as well as treatment of several diseases.

Is Minimally Invasive : thus smaller incisions, reduced interference with the natural state of the body

Is way less painful than conventional procedures

Low risk of complications, well tolerated by patients

- Minimal scarring
- Quick recovery time
- Less time in hospital.

The display of the internal organs on an external monitor for ease of viewing

Doctors need to drive healthcare technology

It is important for physicians to adopt new technology, as they are the first line of implementation of new techniques in solving health problems. As physicians are able to recognise a clinical need that might potentially result in a better patient outcome, they create an environment favourable to diagnostic and treatment solutions. Doctors should be able to advise patients about new options available to offer quality solutions that are cost saving and result in better health outcomes. Physicians play a key role in the development, promotion and adoption of valuable technologies like Endoscopy both for patients and peers.



The multi-functional device : with light source, camera & simple extraction tools

Pacific International Hospital, is dedicated to providing and improving the health and quality of life for the people and the community. A proven leader in medical innovation, PIH offers a wide range of services from primary care to complex surgeries. The hospital has been a pioneer in PNG, providing access to many advanced treatment facilities, including Endoscopy. We offer our patients the best in technology for quick recovery and great experience. Now, people need not travel abroad looking for latest treatment options when it is available right here in their hometown.



The Endoscopy Suite of Pacific International Hospital


The doctors of PIH demonstrating the Endoscopy's function

After reading this article, we hope it will encourage the readers to be aware of the various advantages of Endoscopy. For any further query, you can email us at info@pihpng.com with the subject line: *Dr Paul Alexander, Endoscopist.*

Disclaimer:

The medical information in this article is provided as an information resource only and is not to be used or relied on for any diagnostic or treatment purposes. This information is not intended to be patient education, does not create any patient-physician relationship, and should not be used as a substitute for professional diagnosis and treatment. Please consult your healthcare provider.


The Endoscope What is Endoscopy?



A diagrammatic representation of Endoscopy process

Endoscopy is a medical procedure that allows the physician or doctor to see the internal organs of your body using an endoscope, a thin, flexible tube with a tiny camera and light attached to it. Moreover, this is done without any major surgery. Detects inflammation, ulcers, tumours in the digestive tract, large intestine (colon and rectum) and urinary tract.

How does this work?



SHARING A PROUD MOMENT OF PIH WITH YOU!

We are very pleased to announce that 4 of our Doctors are now officially authorized by the UN Medical Services Division as **UN Examining Physicians in PNG**, and are authorized to process Medical Evacuations for UN Staff.

CONGRATULATIONS TO
Dr. Jannatul Ferdous | Dr. Mathias Sapuri | Dr. Paul Alexander | Dr. Ronald Galicio



Pacific International Hospital : Sec 105, Lot 2, Taurama, 3 Mile, Port Moresby, PNG, Ph: 799 88 000
PIH Clinic : Ground Level, Vision City Mega Mall, Waigani Drive, Port Moresby, PNG, Ph: 7100 2873
info@pihpng.com | www.pihpng.com | [facebook.com/pihpng](https://www.facebook.com/pihpng) | [@pihpng](https://twitter.com/pihpng)



Tabubil Polismeri bai makim Westen Provins

FAIVPELA polismeri long Westen Provins i amamas long makim provins bilong ol long namba 9 Papua Niugini Polismeri Kon-prens.

Polismeri kon-prens i stat long Mande, Me 2 na em bai pinis long Me 6, long Lae.

Ol 5-pela polis-meri long Tabubil em Konstabel Junitha Bogatiwa, Probesineri Konstabel Lina Gigmai, Probesineri Konstabel Grace Pumuye, Konstabel Maria Naur na Sajen Stella Waramani. Sajen Demas

Tapea i helpim long sait bilong fan reising sait bilong ol meri tim bilong em long go long kon-prens na em i tok olsem em i amamas long ol i tok orait long ol bai go long dispela bung. "Ol faivpela polis-meri long Westen Provins bai makim

Noten Flai Rijen," Tapea i tok. Ol i bin reisim K16, 600 bilong helpim ol polis meri i go long dispela konfrens na Tapea i tok tenkyu long ol wan wan lain na bisnis haus long Tabubil sapatim ol polismeri long go long bung.



Faivpela polismeri long Tabubil polis husat i makim Westen Provins long namba 9 Kon-prens bilong ol Papua Niugini Polismeri i kamap long Lae long Me 2 inap 6.

Pipel bilong Westen Provins i salim tok sori

WESTEN Gavana Ati Wobiro i wari tru bikos em i lusim brata bilong em na lida bilong politikel pati bilong em.

Gavana Wobiro i tok dai bilong Hela Gavana Anderson Agiru i brukim lewa bilong em na ol pipel bilong Westen tu i sori tru long em.

Mista Wobiro, husat i wanpela memba bilong Pipol's Yunaited Asembli

(PUA) pati bilong leit Agiru i tok em i sori tru lukim olsem lida bilong em i lusim laip.

Mista Wobiro i bin autim dispela toktok long las wik Sarere long Sir John Guise Stadium we ol man-meri Hela long Pot Mosbi i bin stap haus kraik.

"Mi stap long Cairns, Australia na kam olgeta long hia. Mi sori tru olsem mi lusim lida bilong pati

bilong mi na wanpela gutpela brata bilong mi.

"Long krismas sait, leit Agiru em i yang-pela man tasol mi save kisim edvais long politiks long em. God i bin givim dispela lida long yumi na nau em i kisim em yet bek.

"Ol pipel bilong Westen i salim tok sori i kam long wan-lain na pipel bilong Hela. Mi sori tru olsem bai yumi hat

long painim wanpela man olsem leit Agiru," Mista Wobiro i tok.

Pastaim Memba bilong Pomio, Paul Tiensten, i salim tok sori i kam long leit Agiru.

Mista Tiensten i bin winim ileksen long 2012 aninit long PUA Pati bilong Agiru tasol kot i salim em i go long kalabus long Bomanana.

PNG Yuniversiti sumatin i tok PM i mas go

I kam long ABC

FOAPELA bikpela yunivesiti long Papua New Guinea nau i askim strong Praim Minista Peter O'Neill long lusim wok bilong en bi-hainim wari bilong korapsen.

Christopher Kipalan em i Siaman bilong UPNG Forum i tok ol yunivesiti nau i askim strong Praim Minista long lusim wok blong en bi-hainim wari bilong korapsen na tu, pasin gavman bilong en i mekim long bagarapim ikonomi bilong kantri.

Ol dispela yunivesiti em Yunivesiti bilong PNG long Mosbi (UPNG), Yunivesiti bilong Teknoloji long Lae (Yunitek), Yunivesiti bilong Goroka (UOG) na Papua New Guinea Yunivesiti ov Natural Risos na Enviromen long Is Nu Briten Provins.

Long dispela wik Mande, ol sumatin bilong UPNG i bin statim boycott o ol i no bin go long skul long sapatim dispela askim bilong ol long Praim Minista i mas lusim wok bilong en.

Ol i tok bai ol i no nap go

bek long skul inap Praim Minista i harim tok bilong ol.

Ol sumatin i laikim tu Praim Minista na Polis Komisina, Gari Baki, long givim bek wok long Dairekta bilong National Fraud na Anti-Corruption Dairektoret, Matthew Damaru.

Ol i bin rausim Mista Demaru bihain long ol opisa bilong en i bin pulim kalabusim sampela senia memba bilong gavman bilong Praim Minista Peter O'Neill.



Nambawan Super distributes 2015 Annual Statements

Nambawan Super Limited (NSL) i laik toksave long ol memba bilong en olsem 2015 enuel stetmen i redi.

Sif Eksekutiv Opisa bilong Nambawan Super, Mista Garry Tunstall i tok, "Ol memba i ken go long wanpela ol brens opis bilong mipela long olgeta hap bilong kantri na kisim wanpela kopi bilong stetmen bilong ol o ol i ken yusim nupela NSL smat aplikesen long daunlod o kisim stetmen long intanet stret i go long fon o tablet bilong ol.

Long haitim stori bilong akaun bilong ol memba long ol narapela man, long pastaim, NSL i bin stop long salim ol stetmen long post opis adres.

Ol memba bai go long ol han bilong NSL long provinsal hetkwata klostu long ol long kisim stetmen bilong ol, o nogat, ol i mas ringim kol senta bilong mipela long ol bai kisim long email."

Ol memba bai mas soim NSL memba ID Kat bilong ol o Wok ID kat long kisim stetmen bilong ol.

Ol i ken yusim tu ol dispela samting olsem aidentifikesen bilong ol:

- Tupela pei slip (bilong luksave long fail namba)
- Konfemesen pas bilong Provinsal Opisa olsem;

- Polis (PPC)
- Helt (Provinsal Helt Atoriti)
- Edukesen (Provinsal Edukesen Edvaisa/Skul Inspekta na hetmasta/Prinsipel bilong skul nau tisa i stap long en
- Arapela Dipatmen/Kampani (Human Risos)

- Wanem kain ID (Wok ID, Draiva Laisens, Paspot na moa)

Long mun Februari, NSLi tokaut long wanpela strongpela propit bihain long ol i rausim takis olsem em i kamap long mak bilong K280 milien long 2015 we i mekim Fan inap long kisim mak bilong 5.8 pesen reit bilong kredit we ol i putim pinis long ol akun bilong ol memba, wantiam tu long Choice Super na Ritaimen Seavings Akaun (RSAs) bilong ol memba i ritaia pinis.

Sapos ol memba i laikim moa toksave long stetmen bilong ol, ol i ken ringim mipela long kol senta long telepon namba **3095311, Digicel 73337777 o Bmobail 76112222.**

Ol memba husat inap long go insait long super akaun bilong ol long yusim smatfon na onlain.



Bogenvil Teknikal, Vokesenel na Treid Edukesen i go bikpela



Kaunselor Suzanne Edgecombe bilong Australia Hai Komisen (hansut) i wokabaut i go long ples bilong TVET tisa greduesen long Bogenvil las wik.

Fifti tri (53) tisa bilong Teknikal na Vokesenel Edukesen na Trening (TVET) insait long Atonomas Rijon bilong Bogenvil i bin greduet wantaim wanpela Setifiket IV bilong Trening na Asesmen we Australia gavman i gat luksave long en.

Ol tisa husat i kisim trening bai yusim save long skulim ol sumatin long olgeta hap bilong Bogenvil long wok bilong turisem na long wok bilong hotel, kapenta na konstraksen, plama, egrikalsa, bisnis na edministresen, ilektrikal na atomotiv na

metal fabrikesen treid.

TVET trening em Australia-Pasifik Teknikal Koles na Papua Niugini Nesanel Dipatmen bilong Edukesen TVET wing wantaim helpim bilong Bogenvil Dipatmen bilong Edukesen i bin sapatim long kamap.

Australia Hai Komisen Kaunselor Suzanne Edgecombe i tok olsem Australia Gavman i amamas long sapatim Bogenvil Edukesen Bod na PNG Nesanel TVET win long tingting bilong ol long kamapim wanpela nesanel setifiket bilong

luksave long save bilong ol tisa long teknikal na vokesenel trening.

“Ol tisa husat i greduet tude bai helpim long givim ol trupela save long ol sumatin bilong ol long mekim wok.” Mis Edgecombe i tok.

Mis Edgecombe i tok em i amamas long bikpela namba tru bilong ol sumatin tisa husat i greduet em ol meri.

“Australia i save wok klostu wantaim ol Gavman bilong PNG na Atonomas Rijon bilong Bogenvil long strongim

jenda ikwaliti na sosol inklusen long edukesen sekta.

Wok bilong skulim ol sumatin long teknikal na vokesenel em i wanpela eria we ol man tasol i save stap olsem ol tisa.

Na em i gutpela long lukim olsem planti meri tisa nau i greduet long givim dispela kain skul,” Mis Edgecombe i tok.

Gavanens na Implementesen Fan bilong Australia, Papua Niugini, Bogenvil na Nu Silan i bin TVET sapatim dispela wok we Australia Gavman i go pas long en.

Nupela klasrum helpim sumatin lainim moa



Ol sumatin bilong Koki Praimeri Skul i sindaun arere long sampela bilong ol 12-pela klasrum Australia gavman i helpim PNG Gavman long kirapim.

OL sumatin bilong Koki Praimeri Skul long Nesanel Kapital Distrik bai kisim ol gutpela samting long ol nupela infrastraksa bilong edukesen we Gavman bilong Papua Niugini wantaim Australia i bungim mani long kirapim.

I gat 12-pela nupela klasrum na tupela nupela toilet blok we Australia Ekting Hai Komisina long Papua Niugini, Bronte Moules na Memba bilong Pot Mosbi Saut na Minista bilong Spot, Nesanel Iven na APEC, Justin Tkatchenko i bin opim long las wik.

Ol nupela klasrum na toilet bai mekim skul i kamap naispela long ol 1,000 sumatin bilong Koki Praimeri Skul long

kisim gut skul.

Taim mipela i opim ol nupela fasiliti, mi gat bilip olsem ol klasrum na toilet blok bai mekim ol skul pikinini bilong Koki Praimeri Skul olsem ol pikinini meri bai laik long kam long skul, na kamapim gutpela edukesen na painim gutpela wok.” Mis Moules i tok.

Em i tok Gavman bilong Papua Niugini na Australia i gat bikpela tingting long jenda ikwaliti na long givim moa pawa long ol meri.

“Gutpela edukesen bai givim ol pikinini meri na ol yangpela meri save na strongpela tingting ol i nidim bihain long painim gutpela wok na kamap lida insait long gavman, indastri, na komyuniti”

Mis Moules i tok.

Gavman bilong PNG na Australia i kamapim pinis 400 klasrum na 200 haus tisa insait long

planti hap bilong PNG insait long 4-pela yia nau insait long wok bung bilong tupela.



Jeneral Menesa bilong Treid Pasifik Limited, Wilson David i givim piksa bilong tisa kit long wanpela tisa meri long Pari Praimeri skul. Foto: Frieda Sila Kana

Treid Pasifik givim skul steseneri long Pari Praimeri Skul

Frieda Sila Kana i raitm

PARI Praimeri Skul long Nesanel Kapital Distrik (NCD) em i kamap namba 4 skul insait long NCD long kisim ol skul steseneri bilong sumatin na tisa, aninit long Komoditi Komponen bilong Tuisen Fi Fri (TFF) Edukesen Polisi.

Treid Pasifik Jeneral Menesa, Wilson David wantaim Ekting Asisten Seketeri bilong NCD Edukesen, Sam Lora na ol opisa bilong edukesen wantaim ol projek opisa bilong Treid Pasifik i bin kamap long Pari Praimeri Skul long aste long lukim givim ol mekpas bilong ol tisa na sumatin skul kit we Treid Pasifik i putim wantaim.

Ol dispela skul kit em

bilong ol skul i kisim long Tem 1 bilong skul yia tasol ol matiriel i kam leit bikos mani bilong TFF Komoditi Komponen i no bin go long ol skul yet.

Treid Pasifik, aninit long Pablik-Praivet Patnasip visen bilong gavman, i traim long helpim ol skul long NCD long givim ol dispela matiriel nating tasol bihain taim skul i kisim matiriel mani bilong ol, em bai ol i bekim.

Hetmasta bilong skul, Mathew Agu i tok ol i wet long Edukesen Dipatmen long givim mani bilong Komoditi Komponen bilong TFF long skul tasol em i no kam hariap olsem na em i askim ol papamama na skul bod long ol i wanbel long em i yusim sampela kes mani bi-

long edministresen bilong skul long mekim liklik peimen i go long Treid Pasifik long redim ol skul matiriel we ol i givim pinis long skul long dispela wik Trinde.

Ol pikinini na ol tisa i statim Tem 1 skul yia nating pinis na yusim ol matiriel we ol tisa i painim long strong bilong ol yet.

Dispela mekpas bilong ol sumatain na tisa kit em Treid Print i bin prinim na ol wokman bilong Treid Pasifik i pasim long inap long namba bilong wan wan sumatin na tisa.

Ekting Asisten Seketeri bilong Edukesen long NCD, Sam Lora i tok em i amamas long pasin hetmasta bilong Pari Praimeri skul i mekim long helpim ol sumatin.

Em i tok em bai gutpela sapos ol narapela skul long NCD bai wokim wankain pasintu.

Em i tok dispela ol mekpas bilong skul steseneri em i bilong Tem 1 tasol Pari Praimeri i kisim long Tem 2. I gat 3-pela narapela Praimeri skul na Elementeri skul long NCD i kisim pinis ol skul steseneri bilong ol long Tem 1, wantaim dinau long Treid Pasifik.

Ol dispela skul em Ted Diro Praimeri na Elementeri, Ward Strip Praimeri na Elementeri na Sevese Morea Praimeri na Elementeri skul.



Ol sumatin na ol tisa wantaim sampela papa na mama bilong sumatin i kisim poto wantaim ol piksa steseneri bilong sumatin na tisa kit ol i kisim long Treid Pasifik. Foto: Frieda Sila Kana

Helkopta helpim sikman long Daru

GUTPELA helpim i wok long kamap long Westen Provins nau wantaim YWAM Trening na Medikal Sip, MV YWAM PNG.

I no longtaim i go pinis ol i helpim wanpela man husat i gat 26 krismas long yusim helikopta long kisim sikman i go long Daru Haus sik, bihain long em i kisim wanpela bikpela sik we i opim bel bilong em na ol insait hap bilong bodi i kam ausait.

Ol i bin bringim dispela man i go long YWAM Trening na Medikal Sip, MV YWAM PNG, long las wik Sande nait na em i no bin lukluk gutpela stret. Sip i bin stap long autris patrol long Bamu Rurel LLG na ol famili bilong dispela man i putim long kanu na pul i go antap, pait wantaim tait wara inap 14 kilomita samting insait long tupela auwa olgeta na ol i go kamap long MV YWAM PNG sip.

Ol medikal tim i kisim dispela sikman hariap tru i go insait long nupela de klinik bilong sip we ol dokta na nes i givim em namba wan marasin.

Wanpela Senia Klinik Lida bilong YWAM Medikal Sip, Hannah Peart, i tok, sikman em i kisim bikpela bagarap tru na em i mas go long bikpela haus sik.

Niugini Heliwok helikopta i karim sikman long Bamu Rurel LLG i go long Daru long Westen Provins.

Poto: YWAM Medikal Sip midia.



“Mipela wok nait wantaim olgeta save bilong mipela long helpim dispela man. Tasol dispela em i wanpela hatpela samting stret. Long hia i no gat rot na long kisim em long dingi long open solwara i go long Daru em i no gutpela. Westen Provinsal Helt Sevis tu i no gat we long hariap karim dispela kain sikman i go long bikpela haus sik.

“Gutpela tru na wanpela Niugini Heliwok helikopta i bin kamap long moning taim long kisim wanpela

praimeri heltke tim i go long tripela de patrol long Wes Kikori. Ol i wanbel long helpim dispela man long go hariap long Daru. Mipela i tenkyu stret long dispela,” Mis Peart i tok.

Wanpela Senia Fil Menesa, Dokta Sarah Dunn, i tok dispela keis i soim wanem kain gutpela samting inap kamap taim olgeta lain i wok olsem wanpela tim na em i tok olsem helikopta i gat bikpela wok long sapotim wok long kain ples i stap longwe tru long taun.

Gordon Mase, wanpela Famili Helt Sevis Kodineta bilong Midel Flai Distrik Helt Sevis tu i tok tenkyu long wok patnasip em i lukim long dispela taim.

“Em i gutpela long ol pipel bilong mipela sapos olgeta lain long bringim helt sevis i wok bung wantaim. Mi amamas tru long wanem samting nau i kamap long dispela sikman. Dispela kain ol salens em mipela i save bungim long ol longwe ples olsem. Tasol sapos yumi olgeta bung wantaim, yumi nap long helpim ol pipel bilong

mipela. Em i naispela samting tru!” Mista Mase i tok.

Mista Mase i tok tenkyu long YWAM long lojistik sapot olsem helikopta na ol dokta, nes na ol narapela wokman na wokmeri.

MV YWAM PNG bai wok yet insait long Midel Flai Distrik inap long 5-pela de moa na bihain bai go long Sentral Provins. Insait long wanpela wik tasol ol i givim banis sut na marasin long 3,000 pipel pinis wantaim sampela ol narapela wok tu.

Consort Kedet lainim wok wantaim YWAM Sip

FOAPELA kedet bilong Consort Kedet program i bin joinim YWAM Trening na Medikal Sip, MV YWAM PNG long 18 wik long kisim sampela save long wok antap long solwara olsem hap bilong maritaim trening bilong ol.

MV YWAM PNG i bin wok long bringim gutpela helt sevis na trening insait long Galp, Westen, Sentral na Milen Be Provins stat long Februari 2016. Long stat bilong dispela yia kam inap nau long mun Mei, ol volantia helt wokman na meri bilong MV YWAM PNG wantaim ol helt wokman na meri long ol dispela provins i lukim na helpim 11,000 pipel pinis long sik bilong ol. Ol i wokim pinis trening bilong helt insait long 61 viles pinis.

Ol foapela kedet em, Heldrine Mali, Luxie Mura, Aisolie Omal na Hans Owa. Ol i bin wok long sapotim wok bilong sip wantaim ol YWAM dekopisa, dekhan na ol ensinia. Ol i mekim wok mentenens long dek bilong sip, was long nait, stiaim sip na long ranim ol liklik bot o dingi we i save karim ol heltke tim na ol sikman na sikmeri i go i kam long sip.

Jeneral Menesa bilong Koporet Afes long Stimsip Trening Kampani, David Toua i tok olsem em i namba tu yia long ol kedet i wok wantaim MV YWAM PNG.

“Wok antap long sip MV YWAM PNG em i narapela kain ekspirien bilong ol kedet. Ol i kisim sans long wok wantaim ol man i gat save long dispela kain wok olsem long raun long planti hap bilong solwara na long wankain taim sapotim heltke sevis i go long ol rurel eria.

“Kampani bilong mipela i bin stap strongpela sapota bilong YWAM Medikal Sip, wantaim mani na long lojistik stat long 2011 yet i kam, na dispela kedet program em i narapela moa sapot bilong patnasip bilong mipela,” Mista Toua i tok.

Aisolie Omal, i tok em i namba tu taim bilong em long kalap na wok wantaim MV YWAM PNG.

“Mi bin stap kedet long MV YWAM PNG long ol autris wok bilong en long Sauten rijon na Huon Galp long las yia. Taim sans i kamap gen long dispela yia, mi putim nem bilong mi long go insait. Nau mi kisim planti save na ekspirien long ol YWAM kru.

“Wanpela bikpela samting we mi lainim long nau em long helpim komyuniti sevis projek long ol ples. Mi helpim ol long putim wanpela sola lait kit insait long wanpela etpos, na tupela wara tenk long wanpela ples. Pastaim long ol i kisim tenk, ol pipel i save dring

wara long tais tasol. Ausait long prektikal ekspirien, mi lainim tu planti samting long pasin bilong mekim wok bilong ol narapela lain. Taim bilong mi antap long sip i mekim mi tingting moa long wanem ol bikpela tingting mi gat long laip bilong mi na long ol gutpela tingting long statim wok bilong mi olsem wanpela siman. Mi pilim olsem em i wanpela gutpela presen long taim mi kisim wok antap long sip MV YWAM PNG,” Aisolie i tok.

Ol 4-pela Consort kedet bai wok yet antap long sip MV YWAM PNG long olgeta hap sip i go long en inap long Jun na bai em i go bek long asples basis bilong em long Townsville.



Aisolie Omal na Heldrine Mali karim ol wok tim i go i kam long sip MV YWAM PNG. Ol poto: YWAM midia



Consort Kedet: L-R Hans Owa, Luxie Mura, Aisolie Omal na Heldrine Mali.



Aisolie helpim long putim sola lait kit long Bamio Etpos, Westen Provins.

Ol wok redi long Bogenvil referendam i stat

... 2019 em yia bilong holim vot

OL i makim yia 2019 olsem det we ol pipel bilong Bogenvil bai holim referendam vot.

Ol wok redi long Bogenvil referendam i go het nau wantaim Join Supavaiseri Komiti (JSC) bai bung long Me 6 long skruim ol toktok na plen long dispela samting.

Opis bilong Nesenel Kodinesen Opis bilong Bogenvil Afeas (NCOBA) i tok sans i op nau long Nesenel na Bogenvil gavman long toktok na makim det long holim Bogenvil referendam.

Mekim klia referendum, dis-

pela i min olsem ol pipel bilong Bogenvil bai holim vot long bruk lusim PNG, o stap wantaim PNG.

Long las wik, ol bikman bilong Nesenel Gavman, Atonomas Bogenvil Gavman (ABG) na ol dona patna i bin bung long Mosbi long toktok na makim 2019 olsem yia long holim referendam vot. Na olgeta wok redi bai fokus long dispela yia.

Ekting Dairekta bilong NCOBA, John Avira, i tok Nesenel na Bogenvil gavman i save olsem sampela samting i stap we ol i mas edresim gut na tu,

i mas gat join wokim grup long edvaisim Join Bogenvil Referendam Komiti J(BRC) long wok bilong makim det long holim referendam.

Em i tok ol join wokim grup bai kam long ol nesenel gavman dipatmen na ABG we NCOBA i wanpela long ol tu.

Minista Avira i tok long bung bilong las wik, Vais Presiden bilong ABG, Patrick Nisira, na BOgenvil Afeas Minista, Joe Lera, i bin tok bikpela samting em i mas gat ol bung long toktok long politik bilong Bogenvil na ol samting olsem lusim ol masket o gan, gutpela gavanens, mak long krismas long ol man i vot na i mas gat wanpela indipenden ejensi long ranim referendam.

Ol lain long bung i bin wanbel long holim bung toktok bihain long olgeta

tupela mun na dispela i stap aninit long Referendam wok plen.

Namba wan bung bilong JBRC bai kamap long Me 4, 2016 na dispela em long redi long JS B bai kamap long Me 6, 2016.

Mista Avira i tok bung bilong JSB i lok long Me 6 na em i tok tu olsem Nesenel Gavman na ABG i redi long go insait long ol bikpela program long dispela yia bihain long Desemba 8, 2015 taim ol i no bin wokim wanpela bung.

Ol bai tebolim ol samting we ol i bin toktok long ol long 2015 Kokopo JSB lo ng tok oraitim na go hetim.

Minista Lera i bin tokim ABG olsem em i wok bilong em nau long lukim olsem ol ki stekholda i wok bung wantaim long ol wok redi bilong referendam, na olgeta lida, ol opisel na pablik i mas stap insait long ol toktok.

Stori na Wok

wantaim

Elizabeth Cox

Yumi Inap Long Kaikai Wanem Narapela Kaikai

Toksave: Yumi stori pinis long wanem yumi mas kaikai ol kain kumu, bin na frut wantaim strongpela kaikai. Yu no ken wari tumas sapos i no gat planti abus long ples bilong yu. Sapos yu i gat planti bin, pinat na kumu long kaikai, em i inap tru long strongim bodi bilong yu.

Planti man nau ol i mangalim stua kaikai bikos ol i tok olsem ol i les long wankain kaikai. Yumi stori pinis long stua kaikai i no gutpela tumas. Sapos yu planim planti kainkain kaikai long gaden na mama i traime save long sampela niupela we bilong kuk. Em bai inap long wokim kain kain we long kuk na famili bai pulap long nutrisen kaikai, na amamas. Ol i noken les long wankain kaikai tasol.

Planim kain kain bin na kumu, we yumi inap senisim kaikai bilong kaikai. Planim pinat na sampela taim kukim wantaim kumu sup. Planim sili, kari na kawara long givim tes long sup. Kukim binatang, talinga, pikinini tulip, kru mambu wantaim gaden kaikai sampela taim.

Planim kainkain gaden kaikai oltaim na senis senis long we bilong kukim ol. Olsem famili i no inap les long gutpela gaden kaikai.

Aihi LLG meri amamas long saining MOU

Paulus Tali i raitim

OL meri insait long Wod i inap long Wod 17 long Aihi LLG nau bai amamas long wanem, sainim bilong Memoremum ov Andastending kamap pinis.

Dispela MOA saining i bin kamap long Malahang we lukim ol bikman bilong Aihi asples na ol meri long Wod 1 i go long 17, olgeta i bin kamap long witnessim dispela program.

Tu MOA bai helpim ol long kain kain wok bilong ol meri insait long LLG na komyuniti.

Aihi LLG presiden na siaman bilong Human Risos insait long Morobe Provinsal Gavman, Sam Agi David, i bin sainim Mou namel long Aihi LLG, na ol mama graun.

Misis Mugim Poam i bin givim graun i go long Aihi long ol meri long Wod 1 inap long 17 i ken go het long mekim wok projek long gaden kaikai olsem taro na tapiok long planim na kamapim mani bilong ol meri long sapotim wok

program bilong ol.

Presiden Agi David i tok wok bai kamap namel long ol meri long wod insait long Aihi i noken slip bikos nau em i taim bilong mekim wok na sanap long strong bilong ol yet.

Em i bin tokim ol meri olsem bai ol i gat mani bilong ol yet long strongim laip bilong ol.

Long wainkain taim tu, mamagraun, Misis Poam i tok as tingting em i bin givim graun bikos em i laik lukim sevis i mas kamap na ol inap lukim ol blesing bilong em.

Aihi LLG Kaunsel presiden bilong ol meri, Tama Edward husat makim ol meri long Aihi LLG i bin tok tenkyu i go long Kaunsel Presiden, Sam Agi, yu lida we i gat moa bel long ol kain wok i mas kam insait na makim ol meri na yut.

Misis Edward i tok tenkyu tu long mamagraun, Misis Poam husat i bin wanbel na givim graun long mekim ol wok kamap insait long Aihi LLG.



Condolence Message

H.E. Grand Chief Sir Michael Ogio, GCL, GCMG, KStJ, Governor General of Papua New Guinea, and Lady Esmie Ogio extend their heartfelt sympathies and condolences to the family, friends, relatives and people of Hela province on the passing of their beloved son and Member of Parliament the

Late Hon. Anderson Agiru CBE, MP

The late Mr. Agiru was an up and coming leader beyond his time, a staunch visionary and a force in the political arena. Mr. Agiru played a pivotal role in the progress of Southern Highlands and the new Hela province and in advocating for national unity and ensuring peace and order is maintained in the two provinces. In recognition for outstanding service to the community and politics as a Member of the National Parliament, former Governor of Southern Highlands and as Governor of Hela province, the late Hon. Anderson Agiru was awarded Commander of the Most Excellent Order of the British Empire (CBE) in the 2015 Queen's Birthday Honours List.

"I am truly saddened to hear of the passing of the late Governor Hon. Anderson Agiru. The people of Hela and Papua New Guinea have lost a great leader and son. In mourning, though, may we also celebrate the life of a leader who rendered outstanding service to our nation. On behalf of Lady Esmie and Office of the Governor General, we extend to the family, relatives and people of Hela province our heartfelt sympathies and condolences and pray that peace and comfort be with you all."

"And he will wipe out every tear from their eyes, and death will be no more, neither mourning nor outcry nor pain be anymore. The former things have passed away." Rev. 21:4 (NW)

May His Soul Rest in Peace

Grand Chief Sir Michael Ogio, GCL, GCMG, KStJ
Governor General of Papua New Guinea



Animel bafalo em i wanpela rot sampela bilong trenspot. Hia yumi lukim Pater Rex Stephen Simanji SVD bilong Is Sepik tasol i mekim wok misineri long Brazil, Saut Amerika, na i raun wantaim ol perisina long bafalo long mekim wok bilong em. Poto: Pater Rex SVD

Blesing bilong nupela sapel long Baruni



Kristen Yuniti em min wanem samting?

ANGLIKEN Sios long PNG, long wanpela daiosis bilong em, Pot Mosbi bai selebretim wanpela olupela peris em long St. John the Iwanjelis Katidrel long daun taun long makim 101 yia long dispela Sande 8 Me 2016.

Angliken Sios i kam long PNG long yia 1891 i makim 125 yia long PNG na long Pot Mosbi ol bai amamasim 102 yia ol sios long St. John Iwanjelis Katidrel long dispela Sande.

Long dispela Sande tu, bai yumi lukim 5-pela Daiosisen Bisop bilong Angliken sios wantaim praimet, het Bisop Clide Igara, bai ol i bung wantaim na selebretim dispela bikpela de long givim tenkyu long God long wok bilong Gutnius insait long Pot Mosbi Daiosis.

Invitesen tu i go pinis long Asdaiosis bilong Katolik Sios long Pot Mosbi, Asbisop John Ribat na Modereta bilong Yunaitet Sios tu bai bung wantaim long makim Angliken sios i kam sindaun long Pot Mosbi.

Angliken Daiosis long Pot Mosbi bai givim tenkyu long wok bilong Kepten John Moresby, Sir Hubert Murray na planti moa husat i putim han mak long dispela peris. Tu, yumi bai lukim ol ami i pairapim tripelagan sot long makim God Papa, Pikinini Jisas Krai na Holi Spirit (God Three One.Holy Trinity).

Dispela bai makim olsem bipo yumi nogat Ami Saplen na St.John Angliken Sios tasol i mekim wok bilong Ami Saplensi. Bikpela tenkyu Angliken sios. Hat wok, komitmen na self-sekrifais yumi lukim i karim kaikai.

Tasol bikpela samting mi laik kisim piksa i kam long wok na save bilong yumi em Kristen Yuniti.

Em bai stat long dispela Sande 8 i go inap long 15 Me Pentecos Sande, em Sios bilong Krai i bon long dispela wol.

Yumi bai witnessim Bisop Nathan Ingen bai makim Aipo Rongo (Momase na Highlands) Bisop Allan Miki bai makim Niugini Ailans (NGI) Bisop Tenisen Boga Dogura-(MB) Bisop Linsi Yovhe Popondetta (Oro) Bisop Danny Bray Guka POM(NCD, Gulf, Western and Central) na Praimet yet em het bilong Angliken sios bilong PNG, Bisop John Ribat bai makim Katolik Asdaiosis bilong Pot Mosbi na Modoreta bilong Yunitet Sios.

Dispela sevis bai makim trupela kala bilong kristen Yuniti.

Stat long de wan 8 Me i go long de 15 Me ol Kristen sios long wol i kamapim pinis ol tim na skripsa rid bilong Buk Holi we i stori long ol wok kristen yuniti. As tingting bilong dispela i olsem em wok bilong kristen Yuniti.

Helpim Kristen sios long bung, pre wantaim, pasin bilong wok bung wantaim, pasin bilong luksave na pasin bilong laikim arapela. Long dispela as yumi olgeta i bung insait long banis bilong God.

Pasin bilong tok giaman, tok baksait, tok nogutim narapela sios i no trupela spirit long sios bilong God.

Em wok bilong satan na yumi yet putim i go long han bilong satan.

Sapos yumi wanpela bilong ol dispela lain orait, yumi mas glasim olsem pasin bilong wok bung namel long ol sios na God i bikpela samting.

Fr. Paul Liwun i raitim

LONG namba wan Sande bilong mun Me 2016, em i bin wanpela bikpela de bilong ol Katolik manmeri bilong Baruni, Koukou, Tatana, Kade na Kanudi.

Long dispela de, Asbisop John Ribat MSC, DD i bin katim ribon bilong opim na blesim nupela sapel bilong ol.

Asbisop John Ribat i bin go pas long misa bilong blesim na 5-pela pater i bin joinim em long santu misa.

St Michael's Hanuabada kwaia wantaim Koukou komyuniti i go pas long singsing bilong misa. Planti bata na susa i wok long Pot Mosbi wantaim planti wok manmeri bilong sios i bin kam na joinim ol Katolik manmeri bilong Baruni, Koukou, Kade, Tatana na Kanudi long dispela bikpela selebresen.

Katolik Sios bilong Baruni i gat stori bilong em.40-pela yia ol i bin wokim santu misa long planti ples.

Namba wan misa ol i bin selebretim long nambis long Baruni.



Nupela katidrel long Baruni.

Sampela mun, bihain ol i muv i go long Tatana. Sampela taim bihain ol i muv i go bek long Baruni, na ol i yusim wanpela komyuniti hal bilong United Sios.

Tasol i gat sampela wari kamap na ol i rausim ol long hall, na i go na selebretim Santu misa aninit long wanpela diwai long ples Baruni.

Planti taim ol i kam na bung wokim lotu aninit long diwai. Aninit long dispela diwai tu, Blessed Mother Theresa bilong Kolkata, husat i bai kamap santu

long de 4 Septemba long dispela yia, em i bin stap na joinim misa wantaim komyuniti.

Wanpela taim namel long Santu misa, bikpela ren i pun-daun. Wanpela famili i sori long ol na larim ol Katolik wokim lotu insait long haus bilong em. Ol i bin wokim lotu aninit long dispela haus bilong famili inap long 32 yia olgeta.

Long mun Novemba las yia, Pater Paul Liwun SVD, peris pris bilong ol wantaim sampela ol eksekutiv bilong em i tok strong olsem yumi i mas wokim

Sapel na lusim famili. Yumi mas sioim rispek long praivesi bilong famili tu. Olsem na ol i stat long katim mangro diwai long sanapim wanpela liklik sapel long wanpela hap ol i save tro-moi pipia long en arere long Baruni viles. Foapela man i bin volantia long mekim dispela wok bilong sanapim Sapel. Tupela lapun na tupela yangpela.

Long de 27 Desemba, mipela wokim santu misa long tok tenkyu long Eddie Corletta, famili husat i bin larim Katolik manmeri i bin yusim haus bilong em inap long 32 yia. Asde tasol, de namba wan de bilong mun Me, bikpela selebresen i bin kamap long opim na blesim bilong Sapel. Manmeri i amamas tru long dispela de, serim amamas long singsing na danis wantaim naispela kaikai long amamasim manmeri i kam long witnessim opening na blesing bilong Sapel.

Wok i no pinis yet. Em i Sapel tasol, mipela i driman long wanpela de bai mipela i gat wanpela bikpela haus lotu bai sanap long Baruni.



Ol pikinini i amamas na putim kamap danis bilong ol.



Asbisop na Peris pris, Pater Paul wantaim ol arapela Pater na Sister i wok long go aut bihain long pinis bilong Misa lotu. Ol Poto: Pater Paul Liwun SVD

OL Katolik Kristen manmeri bilong Arawa Peris i gat nupela peris pris nau

O i bin selebretim instaleisen bilong em i no long taim i go pinis.

Pater Patrick i kisim ples bilong Pater Thomas Terere husat i kisim posting i go long Tubiana Peris insait yet long Sentral Dinari long Sentral Bogenvil insait long Bogenvil Daiosis.



Padre Thomas i bin givim Padre Patrik ki na buk baibel long makim olsem em bai i wok long autim na go hetim Gutnius bilong Bikpela Jisas Krai.

Pater Patrik Baria i gat ol narapela bikpela wok tu.

Bisop bilong Bogenvil Daiosis, Bernard Unabali i makim em olsem Vika Jeneral tu na em bai i go pas long ol Sentral denari peris.

Olsem na long toktok bilong em, em i askim ol Katolik Kristen long helpim em long prea na em bai i karim out wok bilong autim Gutnius long ol pipel bilong Bogenvil.

Long Sande Febueri 2, Pater Patrik Baria i bin wokim Instalesen Misa bilong Pater Thomas Terere long nupela peris bilong em, Tubiana Peris.



Padre Patrik ki na buk baibel long makim olsem em bai i wok long autim na go hetim Gutnius bilong Bikpela Jisas Krai.

Stori Eleanor Maineke i raitim na Piksa Tracey Tsiroats

O'Neill na Morauta mas harim toktok bilong Fairweather

KEN Fairweather i raitim wanpela gutpela pas i go long tupela bikpela man bilong dispela kantri.

Dispela pas i bin kam aut long niuspepa long dispela wik.

Ol manmeri i bin ridim dispela pas na wanbel tru bikos Mista Fairweather i mekim gutpela toktok.

Dispela toktok em long stretim hevi bilong foren karensi i sot long kantri bilong yumi.

Memba bilong Sumkar i tok i gat wanpela we long stretim dispela hevi i stap.


Dispela wei em long kisim sampela mani bilong PNG i stap long Singapore.

Mista Fairweather i tok Praitim Minista Peter O'Neill na Sir Mekere Morauta i mas wanbel long kisim sampela mani bilong PNG Sustainbale Development Program (PNGSDP) i stap long Singapore na karim i kam insait long PNG.

Dispela em i wanpela gutpela rot we PNG i ken bringim i kam insait K6 bilien bilong PNGSDP i stap long Singapore.

Dispela mani i ken helpim PNG long daunim dispela hevi bilong foren karensi i sot. Foren karensi em i mani bilong arapela ol kantri o mani bilong Amerika we ol i save kolim US dola.

Nau Mista O'Neill na Sir Mekere i no wanbel na stap wan-



Jada 016

taim. Tupela i kot long Singapore long husat bai bosim ol mani bilong PNGSDP.

Sir Mekere em i siaman bilong PNGSDP na Mista O'Neill i bos bilong dispela kantri na gavman.

Gavman i nau kot wantaim PNGSDP long givim ol pawa long kontrolim PNGSDP i kambek long gavman.

Dispela kot i no pinis yet. Tupela Sir Mekere na Mista O'Neill i kot yet. Tasol Mista Fairweather i laikim tupela lida long putim kot na pasin kros i go ausait na putim PNG i go pas.

Em i laikim tupela poroman bilong em long daunim tupela yet na larim tupela i wanbel na wok wantaim long sevim laip bilong

bisnis na manmeri long kantri bilong yumi.

Sir Mekere i bekim dispela toktok bilong Mista Fairweather. Sir Mekere i wanbel long kisim dispela mani i kam insait long PNG.

Em i autim dispela tingting long niuspepa na olgeta manmeri PNG i lukim dispela pinis.

Sir Mekere i tok em i no wanpela hatpela samting. Em isi na em i stret. Toktok Mista Fairweather i mekim i ken karim kaikai.

Dispela kaikai em i long helpim PNG na larim kantri i abrusim dispela hevi bilong foren karensi i sot.

Sir Mekere i tok nau yet em i hat long PNGSDP i kisim dispela mani i kam insait long kantri bikos kot i stopim operesen bilong em.

Em i tok Gavman bilong PNG i mas rausim dispela kot na larim PNGSDP i operet gen.

Sapos gavman i rausim kot long Singapore, dispela bai inapim PNGSDP long kisim mani.

Nau yet kot i lokim olgeta mani. PNGSDP i hat long rausim wanpela mani.

Mista O'Neill i no bekim wanpela toktok long dispela.

Em i tingting long kisim dinau mani long International Finance Corporation (IFC).

Long dispela wik Mande, Ga-

vana bilong Sentral Benk, Loi Bakani, i tok ol i stretim toktok pinis wantaim IFC long kisim dispela dinau mani.

IFC i wanbel long givim US\$ 300 milien (K967.7 milien) long Central Benk.

Sentral Benk bai skelim dispela mani i go long ol komesal benk olsem ANZ, BSP na Westpac, we ol kampani i ken kisim ol foren karensi long mekim ranim bisnis.

Mista Bakani i tok wanpela as bilong foren karensi i sot em bikos Ok Tedi main i bin pas taim El Nino i daunim level bilong Flai Riva.

Tasol Sentral Benk bai bekim dispela mani wantaim intres.

Sapos ol gavman na PNGSDP opisal i wanbel na kisim dispela K6 bilien i kam insait, em bai bringim gutpela samting i kam long kantri.

Em bai apim level bilong foren eksens bilong PNG na dispela i ken helpim ol kampani long mekim bisnis gut.

Ol pipel bilong Westen Provins tu bai kisim benefit long dispela mani.

Tasol em i wok bilong gavman long skelim dispela tingting bilong Mista Fairweather na Sir Mekere. Sir Mekere i wanbel long helpim kantri i abrusim dispela hevi.

Tasol yumi no save sapos Mista O'Neill bai wanbel o no gat. Yumi lukluk tasol.

Gutpela lidaman kamapim gutpela sindaun



WANEM kain komyuniti i stap, sapos em i gutpela o nogat i bihainim kain lida em i gat.

We ol manmeri i amamas i soim i gat gutpela lida na we ol manmeri i stap krangki i soim lidaman i no gutpela (Buk Saveman 29:2).

Dispela tok i tru long ol komyuniti long Papua Niugini na long kantri wantaim.

Lidaman em i olsem draiva bilong kar, sip o balus. Sapos em i draiv gut na abrusim ol ples nogut orait, ol manmeri i sindaun gut na sapos em i draiv i go long ol ples nogut orait olgeta manmeri long dispela ka, sip o balus i no inap sindaun gut. Ol bai stap wantaim hevi na pret.

Na olsem long komyuniti i stap gut, em i mas gat gutpela lidaman.

I luk olsem long Papua Niugini i gat planti hevi i stap. I gat hevi bilong loa na oda,

manmeri i nogat gutpela helt, nogat gutpela skul, nogat rot o gutpela rot na planti manmeri i nogat mani long poket bilong ol.

Dispela i soim olsem Papua Niugini i nidim gutpela lida. I no olsem hetman bilong kantri tasol long wanwan ol provins, distrik, komyuniti na famili.

Wok bilong lidaman i stap long famili i go inap long ol bikpela opis. Na manmeri i lidaman tu. Stap bilong ol bai bihainim wanem ol disisen ol i mekim, ol gutpela disisen bai lukim ol i stap gut na

amamas na ol disisen i no gutpela bai lukim ol stap wantaim hevi. Hevi long laip bilong wanpela yet, long famili, komyuniti na kantri wantaim.

Pasin bilong harim tok na rispek i gutpela pasin tu.

Loa bilong noken paitim meri.

Taim papa i sakim tok, dispela i lukim em i go long kalabus o mama i lusim papa na bekim bilong dispela i lukim famili i nogat man long lukautim. Pikinini i stap turangu.

Long komyuniti, Nesenel Kapitel Distrik Gavana Powes Parkop wantaim Komisen bilong em i tok long noken salim buai long pablik.

Dispela loa i kamap long mekim ples i klin na gutpela.

Tasol manmeri i sakim tok na salim buai long pablik ples yet. Bekim bilong dispela sakim tok i lukim Pot Mosbi

siti i luk deti, smel na i ken kamapim sik.

Long ol pablik opis, loa i tok long ol Memba bilong Palamen na ol gavman opisa i no ken paulim mani. Taim ol i brukim dispela loa bekim em mani i sot.

Mani i sot long gavman i no inap mekim rot, nogat haussik, skul, manmeri i no inap mekim maket o mekim bisnis na ol manmeri i nogat mani long strongim sindaun bilong ol.

Sampela taim tok bilong God i no go long ol. Bungim wantaim dispela hevi bai lukim sindaun bilong ol manmeri i no gutpela long bodi na spirit wantaim.

Olsem yumi tok gen, stap bilong gutpela lidaman i lukim wanpela, famili na komyuniti i sindaun gut wantaim bel isi. Taim lidaman i no gutpela, dispela bai lukim hevi i stap.

Published Weekly, Thursday, for Word Publishing Company, Ltd.
P.O. Box 1982, Boroko, NCD
Papua New Guinea
Telephone: (675) 325 2500
Fax: (675) 325 2579

Email: editorial@wantokniuspepa.com

Pe bilong wanpela yia 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Hela pipel i stap haus kra i bilong namba wan pikinini man na trupela lida...

Leit Gavana Anderson Pawa Agiru

GAVANA bilong Hela Provins, Anderson Pawa Agiru, i dai las wik Fonde long Pot Mosbi.

Leit Mista Agiru i bin lusim laip long 9-kilok moning long Pacific International Hospital (PIH) long Pot Mosbi.

Ol dokta i tok leit Agiru i bin kisim sik long kidni bilong em. Em i bin go long haus sik long Saina long mun Jun na kambek long mun Disemba las yia.

Mista Agiru i bin painim sik long mun Jun las yia na em i no bin pilim orait.

Praim Minista Peter O'Neill i bin givim em sampela mani na ha-iarim Falcon Jet balus bilong gavman long kisim Mista Agiru i go long Saina.

Las wik Fonde, Mista Agiru i bin lusim laip taim em i bin slip yet long haus.

Ol man i bin kisim em i go long PIH tasol taim ol i kamap long PIH long 9-kilok, ol dokta long hap i tok em i dai pinis.

Ol manmeri bilong Hela i stap long Pot Mosbi i bin kirap no gut taim ol i bin harim dispela nius olsem Mista Agiru i dai.

Long Fraide las wik, bikpela haus kra i bin kamap long Sir John Guise Stadium long Pot Mosbi. Planti ol haia bas na kar i bin pulapim sait rot long Visen Siti na i nsait long stedium ka pak.

Ol manmeri i bin pulapim ste-



Leit Gavana Anderson Pawa Agiru

dium na planti i bin kra i na wari tru long namba wan pikinini man bilong Hela na lida bilong ol i dai. Olgeta manmeri Hela i bin kirap no gut olsem lida bilong ol i dai na planti i bin kra i na autim wari

tingting bilong ol. Long Facebook, planti manmeri Hela i senisim profail poto bilong ol wantaim piksa bilong Leit Agiru. Long Fonde, taim nius i kamap

olsem namba wan pikinini man na trupela lida bilong Hela i dai, olgeta ples i nsait long Hela i kamap tudak na bikpela ren wan-taim graun guria i bin kamap.

Long Fraide, ol manmeri long Tari i tok bikpela ren i kamap, na dispela i soim olsem Hela i lusim wanpela lida we God i bin makim na givim long ol.

Leit Agiru, husat i wanpela biknem lida long PNG, i bin statim politikel keria bilong em long 1991 taim em i bin sanap long bai ileksen bilong Sauten Hailans ri-jonal sia taim Sir Wiwa Korowi i bin lusim sia na kamap Gavana Jeneral bilong PNG.

Mista Agiru i no bin winim dispela bai i leksen. Em i bin sanap gen long 1992 nesanel ileksen long resis long kamap gavana bilong Sauten Hailans.

Tasol em i no bin win. Long 1997, em i sanap gen na em i winim sia bilong Sauten Hailans ri-jonal.

Fainens Minista na Tari-Pori MP James Marape i tok Mista Agiru i no save mekim wanpela paul pilai long ileksen bilong em.

Leit Agiru i no save yusim mani long taim bilong politiks. Ol manmeri yet i save bilip strong long em i kamap lida na ol yet i save makim em, Mista Marape i tok.

Long yia 2007, Mista Agiru i bin winim ileksen na kamap gavana

bilong Sauten Hailans gen.

Save na gutpela tingting God i bin givim Leit Agiru i bin stopim PNG Ges Projek, we Australia i bin tingting long pulim ges bilong Hela i go long Gladstone long Kwinslan na kamapim rifaineri long hap.

Leit Agiru i bin go pas long mekim ol negosiesen na stretim toktok wantaim ol papagraun long Hela, ol provinsal gavman, nesanel gavman na ExxonMobil, projek divelopa bilong PNG LNG Projek, long kirapim dispela bikpela K43 bilien ges projek.

Bodi bilong leit Gavana Agiru i nau stap yet long Pot Mosbi long han bilong Nesanel Gavman. Long Fonde dispela wik, haus kra i bai kamap long Nesanel Palamen, we ol arapela lida bilong kantri bai givim las rispek na tok gutbai.

Long Fraide, Praim Minista Peter O'Neill wantaim ol lida bai kisim bodi i go long Mendi, we ol pipel bilong Sauten Hailans bai givim laspek long leit Agiru.

Ol bai karim bodi i go long Tari long Sarere dispela wik we Nesanel Gavman bai givim bodi i go long han bilong Hela Provinsal Gavman.

Hela Provinsal Gavman bai givim bodi i go long han bilong ol famili na wan lain bilong leit Agiru. Ol bai planim em long Tari.



Ol lida man bilong Hela Provins i wari na kra i long kofin bokis bilong leit Gavana Agiru long Sir John Guise Stadium long Pot Mosbi las wik Fraide.



Hela komyniti long Pot Mosbi i go insait long stedium long las wik Fraide.



Minista bilong Haia Edukesen Malakai Tabar (Membra bilong Gazelle), Memba bilong Maprik Simon John, Memba bilong Mosbi Not Is, Labi Amaiu, na pastaim Memba bilong Midel Ramu, Ben Semri i lukim bodi bilong leit Gavana Agiru.



Ol man i karim kodin bokis bilong leit Gavana Agiru i go insait long stedium.



Sampela ol man Hela i wari no gut tru long lida bilong ol.



Planti manmeri Hela na Sauten Hailans i bin go long haus kra i.



Hela Provinsal Administreta William Bando i toktok long ol pipel long sanap wantaim long yuniti na wanpela spirit.

20 yia wok bisop bilong Bisop Francesco Sarego, SVD ...Bisop bilong Goroka



Bisop Francesco Sarego, Bisop bilong Goroka we em i stap na kamap pater na nau bisop long lukautim ol Katolik pipel long hap.



Odinesen bilong Bisop Francesco long 1996. Ol bisop, sampela i dai pinis olsem leit Asbisop bilong Pot Mosbi, Asbisop Sir Peter Kurongku namba tu long hankais na namba wan long hankais, Asbisop Sir Karl Hesse i ritaia pinis na i go sindaun long asples bilong em, Gemani.

BISOP Francesco i bin kam long PNG long yia 1969 olsem wampela man seminari.

Em i mekim pastoral wok long Yobai, Wangoi, Koge, Goroka, na Mt. Hagen.

Long PNG em i kamap diken na wok olsem diken inap long 16 yia. Francesco i kisim Sakramen bilong ordo bilong kamap pater long 1986.

Em i kamap bisop bilong Goroka Daiosis long 27 de bilong Epril 1996. Nau em i gat 77 kris-mas na em i lukautim yet daiosis bilong em.

Klostu 4,000 pipel i bin kam bung long Kefamo Peris, Goroka

long bikpela Tok Tenkyu Misa na long selebretim 20 yia wok bisop bilong Bisop Francesco Sarego, SVD.

Asbisop Douglas Young i bin givim tok skul long taim bilong misa.

Bisop Anton Bal, bisop bilong Kundiawa Daiosis na Bp. Henk Te Maarssen, ritaia bisop na planti pater i kam selebretim wantaim em.

Wan wan peris i bin i bringim ol presen bilong ol long Bisop Francesco wantaim singsing na singaut bilong amamas.

Ol i laik tok tenkyu long Bisop

Francesco long em i stap gutpela wasman bilong ol.

Ritaia Abp Maikel MeierSVD i bin alim tok amamas na gude long Bisop Francesco na pipel bilong Goroka.

Asbisop Meier i bin go pas long lotu bilong Francesco i kamap bisop 20 yai i go pinis.

PNG Gavman i luksave long bikpela wok bilong Bisop Francesco na i givim em namba bilong 'Chief of Logohu'.

Yum i olgeta i tenkim Bisop Francesco long 20 yia wok wasman bilong Goroka Daiosis. God i ken blesim em moa yet.



Bisop Francesco i bin kisim luksave long Stet long wok em i mekim long komyuniti, sios na kantri na kisim Logohu Awod. Em i sanap nau Gavana Jenerel, Sir Michale Ogiio bihain em i kisim awod long Gavman Haus.




Ol perisina i laik prisenim ol presen bilong ol long bisop.



Bisop Francesco insait long Misa Lotu wantaim ol arapela bisop.

Em nau! Ol pikinini i ken painim rot i go long ples wantaim Wantok lain...



Yu pinis! Em ples bilong yu

STORI BILONG TUMBUNA

Nupela Lain Man Kamap

Long wanpela taim, wanpela man i stap. Nem bilong em Ik-Lisakalimbu. Long dispela taim i gat naispela tupela meri i stap. Planti yangpela man i laikim tupela, na oltaim ol i save i go pulap long haus bilong tupela long kirapim singsing meri wantaim tupela.

Ikisakalimbu i gat wanpela bikpela graun tru. Nau wanpela tewel man tu i gat wanpela bikpela ston. Dispela bikpela man wantaim tewelman tupela i save poroman gut tru i stap.

Wanpela taim planti yangpela man na tewelman tu ol i go singsing meri wantaim tupela yangpela meri. Olgeta yangpela man i go singsing long tupela meri. Tasol taim tewelman i laik singsing long tupela na tupela meri is pet long pes bilong em na tokim tewelman olsem, husat i laik singsing wantaim yu.

Tripela taim gen tupela meri i no laik singsing wantaim em, na tewelman i sem na i go long haus bilong em. Wanpela nait tewelman i redim wanpela bet na karim i go long haus bilong tupela meri. Long biknait tru tewelman i karim tupela meri i go long haus bilong Ikisakalimbu na putim tupela long arere tru long haus. Long moning taim tru tupela i kirap na lukim dispela haus i no bilong tupela na tupela i tok tok planti tru i stap.

Papa bilong haus i kam na tok, husat i stap long haus bilong mi. Tupela i tok, mitupela i no save husat i bringim mitupela long haus bilong yu. Man i tok orait yutupela i wet na mi kilim wanpela pik long yutupela. Em i kilim wanpela pik na mumuim pinis givim tupela long karim i go.


Tasol long nait tewelman i ronim dispela ples long ol bikpela ston na tupela meri i no inap go long haus bilong tupela na kam bek long haus bilong Ikisakalimbu. Man i tokim tupela bilong wanem yutupela i kam bek? Tupela i tok olgeta hap i pas long ston na mitupela i no inap long go. Man i tok, sori tumas mi no inap long mekim wanpela samting long helpim yutupela.

Tupela meri i tingting planti na i tok, maski mitupela i no man na tingting long go bek long ples bilong mitupela. Maski mitupela i ken stap long hia. Nau yangpela man i maritim tupela meri wantaim. Tupela i karim tupela pikinini man. Nem bilong tupela em Waimba-Pembe na Yambarani.


Namba tri pikininiem i kolim Waim-Kungu. Nau Tsak Veli i gat tripela bikpela lain man tru i pulap i stap ol i kisim nem bilong ol stret. Olsem yu lukim tewel i helpim Ikisakalimbu long kamapim bikpela lain man insait long Tsak long Enga Distrik.



<i>Ol wod lista:</i>	DRAIWARA	INDAI	MANGO
	ERAMAUTIM	JAK	MISIN
ADRESIM	FUTBAL	KEPTEN	MUMU
AROVARIM	GLASIM	KATOLIK	NAMBIS
BAKSAIT	GURIA	KRAKON	NILDAUN
BIHAINTAIM	HANDEL	LAIPMAN	OLSEM
DINGI	HETIM	LUKLUKIM	PATER



Ansa bilong Wod Pilai isu 2172





TOK PISIN NEWS
from Radio Australia
radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)

Yanpela Vanuatu meri i dai bihain em i kalap long bas



Mas long Port Vila egensim pasin bilong paitim na bagarapim meri. Foto: John Salong

Caroline Tiriman i raitim

WANPELA yangpela meri bilong Vanuatu i bin dai long Tunde bihain em i kalap long wanpela bas we i ran long rot long Port Vila.

Ol i tok meri ya i bin kalap lusim bas na brukim het bilong en taim em i em i traिम ronawe long wanem, bas draiva i mekim ol kainkain toktok i no gutpela na em i pret.

Dispela i mekim Siameri bilong Vanuatu Women against Crime na Corruption i askim

Australia gavman long skelim gut mani em i save givim daunim kraim bihain long wanpela yangpela meri I dai bihainim seksuel vilens.

Dispela birua i kamap bihain long ol narapela teksii draiva i bin paitim wanpela meri long mun i go pinis long wanem, em i bin mekim toktok egensim ol teksii sevis long sosel midia.

Dispela kain hevi i bin fosim ol pipel long Port Vila long mas i go long Palamen long givim petisen bilong ol i go ol memba.

Sentral Guadalcanal holim tupela man

Sam Seke i raitim

OLGETA Guadalcanal Provins polis long Solomon Ailan olketa arestim finis tupela man na sasim ol long kukim sampela propeti na ol haus ong Wind Ridge antap long Tenaru Sentral Guadalcanal tupela wik i go pinis.

Guadalcanal Provinsal Polis Komanda, Clement Marigen i tok ol polis i go het lukautim sampela saspek na tu, ol i askim ol pipel insait long komyniti long helpim wantaim ol wok investigesen.

Long wankain taim, PPC Marigeni I tok olgeta politikel, komyniti nap les lida I mas sindaun na stretim dispela hevi.

UN Humen rait long PNG

Caroline Tiriman i raitim

WANPELA lida meri bilong Humen Rait long Papua New Guinea i tok em i wanbel olsem bikpela miting bilong United Nations Human Rights Council bai toktok long ol wari bilong Humen Rait long PNG.

Helen Hakena, Siameri bilong Not Bogenvil Humen Rait Grup i mekim dispela toktok bihainim ol ripot olsem rekot bilong PNG long Humen Rait bai stap long ol toktok bilong United Nations long Geneva

long mun bihain.

Papua New Guinea i no gat gutpela rekot long sait bilong Jenda beis Vaiolens, na tu, wok bilong helpim ol meri long mekim wanem kain samting em ol i laik mekim.

Narapela samting em i wok long kamapim bikpela wari long PNG em pasin bilong kilim nating ol narapela bihainim ol tokwin bilong Sanguma o soseri.

Long odio, Misis Hakena i toktok long tingting bilong en long dispela jenda based vaiolens miting long Geneva.

WNB Gavana i tok pipel i mas planim rais

Caroline Tiriman i raitim

SASINDRAN Muthuvel i tok ol pipal bilong en i mas planim rais na no ken lukluk tasol long oil pam.

Gavana bilong Wes Nu Britain Provins i askim strong ol pipel bilong en long planim rais na no ken lukluk tasol long oil pam.

West New Britain i wanpela ples we planti pipel i save groim pam oil, tasol Gavvana Muthuvel i tok, em i laikim rais long kamap olsem namba tu bikpela egrikalsa

bisnis long provins.

Emi bin mekim dispela toktok bihainim raun bilong en i go long Rais na Egrikalsa Filk De long Erap Fam em Trukai Industri Limitit i papa long en long Morobe Provins long wik i go pinis.

Gavana Muthuvel i bin sainim wanpela tok orait wantaim Trukai Industri Limitit (TIL) tripela yia i go pinis long helpim ol fama long Wes Nu Briten long save gut long groim rais.

Rais i kamap nau olsem wanpela kaikai em planti pipel long PNG i save laikim tumas.

PNG Suprim Kot i tok asailam sika senta bilong Australia i mas raus

Caroline Tiriman na Sam Seke i raitim

SUPRIM Kot bilong Papua New Guinea i givim aut disisen olsem dispela asailam sika kalabus bilong Australia long Manus Ailan em i brukim loa bilong PNG na ol i mas pasim.

Ol 5-pela jas i bin kamapim toktok olsem dispela senta i brukim loa we i save lukautim human rait bilong ol pipel long oli noken kalabus ol pipal nating sapos ol i no brukim loa. Dispela loa I stap insait long Mama Loa o Konstitusen bilong PNG.

Australia na Papua New Guinea i bin kamapim wanpela tok orait sampela yia i go pinis bilong larim ol asailam sika em ol i save laik kam long Australia olsem ol i mas go long Manus Ailan we PNG Gavman i mas lukluk long ol sapos ol i refuji trutru o nogat. Sapos sampela i rrefuji trutru, ol i ken stap olgeta long PNG, na sapos nogat, bai ol i mas go long ol narapela kantri o, i go bek long ol mama kantri bilong ol.

Australia i gat strongpela polisi o loa olsem emi no laikim wanpela refuji long go stap long Australia. Nau tingting bilong PNG

Suprim Kot i kirapim planti toktok olsem dispela bilong Loani Henao husat i bin sanap makim Oposisen lida bipo, Belden Namah, husat i bin bringim dispela tingting bilong kirapim asailam sika kalabus i go long kot.

Man husat i go pas long dispela keis Loanai Henao, na long Australia, lida bilong Greens Pati long Australian Palaman, Richard Di Natali i tok, dispela tingting bilong PNG Suprim Kot mas mekim rot bilong ol lain long Oposisen na gavman long tingting gut nau na painim wanpela gutpela rot long lukautim na stretim wari bilong ol refuji husat i save laik kam long Australia.

Imigfresen Minista bilongf Australian, Peter Dutton, i tok maski PNG Suprim Kot i mekim despela ruling, Australia bai no ken bringim ol asailam sika i kam long Australia. Na em i tokaut long midia aste olsem em i wok long toktok pinis wantaim ol narapela kantri long kisim ol dispela asailam sika.

Tasol lida bilong ol lain husat i save sapatim ol refuji long Australia, Ian Rintoul i tok Minista Dutton i mas bringim ol dispela pipal i kam long Australia.

Taim Suprim Kot long PNG i tok Australia Asailam Ditensen Senta long Manus i brukim Mama Loa na ol i mas pasim.

Wanpela loya, Ben Lomai I wok nau bilong askim Suprim Kot long larim olgeta asailam sika long lusim dispela senta.

Emi laikim bai olgeta pipal i stap long senta i mas lusim Manus na kam long Australia.

Mista Lomai i tok em i laikim kot i mekim disisan tu long ol dispela asailam sika i mas kisim kompensesan.

Long wankain taim, Memba bilong Manus Open long PNG Palamen, Ronnie Knight, i tok tupela gavman bilong Papua New Guinea na Australia i mas bihainim dispela disisen bilong Suprim Kot long rausim dispela ditensan senta long Manus.

Mista Knight i tok tupela gavman i mas bihainim tu ol promis bilong tupela long sait long ol projek ol i tok bai ol i wokim long helpim ol pipel bilong Manus.

Em i tok ol i mas peim ol pipel bilong Manus husat i givim ol sevis na wok long ditensen senta, taim ol i pasim.

Moun Hagen Siti Atoriti



Urupyke singsing group bilong Maun Hagen. Foto: madNESS Photography

Sam Seke i raitim

PRAIM Minista Peter O'Neill i tude i bin lon-sim Maun Hagen Siti Atoriti (MHCA) long Westen Hailans Provins.

Dispela em i bilong mekim Maun Hagen taun i kamap opisali olsem wanpela siti olsem long Lae na Mosbi.

Narapela Siti Atoriti PNG Palamen i bin wanbel long en long yia i go pinis em bilong

Niugini Ailans we bai ol i wokim long Kokopo long Is Nu Briten Provins.

Dispela Maun Hagen Siti Atoriti bai lukim tu long ol i surikim boda mak long Hagen taun na mekim bikpela moa - na bildim moa infrastraksa na ol kainkain samting.

Senia NBC redio program opisa na presenta long Maun Hagen, Jack Tame i tok long tude tu, Praim Minista O'Neill em i opim nupela Nesenel Developmen Benk long Maun Hagen.

PNG Air i lonsim nupela Tok Pisin sevis websait bilong kampani, em www.pngair.com.pg.

Wantok Niuspepa i bin sekim dispela nupela Tok Pisin sevis long websait bilong PNG Air na wanbel long Tok Pisin stail ol i yusim, maski sampela ol Tok Pisin toktok i no stret.

Sif Komesal Opisa bilong PNG Air, Paul Abbot, i tok dispela nupela Tok Pisin sevis long websait bai helpim ol kastoma, husat i no save ridim Tok Inglis, long sekim ol sevis na ol arapela samting long websait.

“Mipela i senisim pes bilong kampani na dispela Tok Pisin sevis long websait i soim tu olsem png Air em i tru tru balus kampani bilong PNG stret.

“PNG Air i lukluk tu long mekim bisnis long PNG, sevim ol

pipel bilong PNG na mipela i amamas long kamap olsem wanpela kampani bilong PNG.

“Dispela i kamap ples klia long disain bilong balus, ol nupela yunifom, na nau long nupela websait bilong mipela,” Mista Abbot i tok.

Mista Abbot i tok ol manmeri ken lukim websait bilong ol long Tok Pisin o Tok Inglis.

“Ol kastoma i ken nau sekim websait bilong mipela long tupela tok ples. Ol manmeri husat i stap long ovasis tu i ken lukim dispela websait bilong PNG Air long Tok Pisin na skelim liklik hap tokples bilong yumi PNG,” Mista Abbot i tok.

PNG Air opim nupela Tok Pisin websait sevis

PNG Air balus



Yusim ol samting bilong mobail pon gut

OL liklik bisnis manmeri long PNG i mas stat long yusim olgeta samting i stap long mobail pon bilong ol.

Sampela ol aplikesen o ol samting i stap long mobail pon i save helpim ol manmeri long mekim bisnis i kamap isi.

Tasol sampela ol aplikesen i no gutpela, we bai yu westim bikpela mani.

Dispela toktok i kam long Dianne Wang, husat i bin kam toktok long wanpela bikpela bung bilong ol liklik bisnis manmeri husat i laik

mekim bisnis wantaim intanet na mobail komyunikesen teknoloji.

APEC Bisnis Edvaisori Komiti (ABAC) wantaim Invesmen Promosen Atoriti (IPA) i bin kamapim dispela bung long Pot Mosbi.

Mis Wang i tok plant ol manmeri long PNG i painim hat long yusim mobail pon na mekim bisnis bikos ol i no save long yusim ol arapela aplikesen.

“Mi painimaut olsem planti manmeri long hia i no save gut long yusim ol

arapela aplikesen o ol samting bilong mobail pon,” Mis Wang i tok.

Em i tok dispela em i wanpela as we i mekim hat long ol manmeri nating i mekim bisnis long mobail pon.

“Sapos yu laik baim wanpela masin bilong samapim klos long sip prais long Saina, sekim websait bilong kampani bilong mi, DHGate.

“Dispela em i bisnis, na pasin bilong mekim kain bisnis olsem em i kamap isi tru taim mobail pon i kam

insait long laip bilong ol manmeri,” Mis Wang i tok.

Tasol long PNG narapela samting tu i mekim hat long PNG manmeri i yusim mobail pon na mekim bisnis.

“Mi luksave olsem prais bilong baim intanet data long PNG em i antap tumas. Long sampela kantri, mani mak bilong baim intanet em i no bikpela mani,” em i tok.

Dispela em i wanpela as we i holim bek ol manmeri PNG long mekim bisnis long websait na intanet.



Dianne Wang

LNG i mekim gut mani: Botten

OIL Search Limited i wok long mekim win mani na ranim gut kampani maski prais bilong oil na ges long intanesenel maket i pundaun, Menesing Dairekta Peter Botten i tok.

Mista Botten i tokim ol bik manmeri long Bernstein Roadshow long New York siti long Amerika las wik olsem Oil Search i wok long mekim yet winmani taim ol arapela oil na

ges kampani long arapela katri i wok long lusim mani taim prais bilong oil na ges i pundaun i kam daun.

Mista Botten i tok operesen bilong Oil Search long PNG em i helpim kampani mekim winmani bikos projek em i nidim liklik mani long ranim, ges na oil em i hai kwaliti, na mani long yusim i stap yet.

Mista Botten PNG LNG Projek,

we Oil Search i gat 29 pesen sea-holding, i wok long mekim gut win mani na dispela i lukim kampani i ran gut tru taim prais bilong oil na ges i pundaun na sampela oil na ges kampani i wik long bungim hevi.

Mista Botten i tokim ol investa olsem PNG LNG Projek i gat plen long kirapim namba tri tren wantaim P’nyang ges projek.

“Mipela i lukluk long kirapim namba tri tren bilong PNG LNG Projek. Antap long dispela, namba LNG Projek tu i kamap.

“Papua LNG projek bai kamap klostu taim na mipela i amamas long tokim ol investa olsem PNG em i wanpela kantri we prais bilong ranim kain ol bikpela projek em i damblo tru, i no bikpela mani,” Mista Botten i tok.



Peter Botten



Ol wok manmeri bilong BSP na Air Niugini i amamas long kamapim nupela patnasip long sevim ol kastoma gut.

Baim balus tiket wantaim BSP mobail benking

AIR Niugini i tokaut long wanpela gutpela patnasip em i kamapim wantaim Bank South Pacific (BSP) long larim ol kastoma bilong BSP i baim balus tiket wantaim mobail benking sevis bilong BSP.

Ol mobail benking kastoma bilong BSP benk, husat i save mekim benking sevis wantaim bmobile-vodafone na Digicel bai gat sans long yusim dispela sevis.

Ol kastoma bilong BSP mobail benking sevis bai skelim olsem dispela sevis em i wanpela gutpela sevis stret bikos ol i no nid long sanap long longpela lain long baim balus tiket tasol ol i ken yusim mobail pon long

peim mani i go insait long akaun bilong Air Niugini.

Ol kastoma i ken yusim wanpela sotpela kode, em *277#.

Bosman bilong Air Niugini, Simon Foo, i tok Air Niugini i wok long givim gutpela sevis i go long ol kastoma na nau dispela nupela sevis bai mekim ol kastoma i yusim mobail pon bilong ol long baim balus tiket na bukim sia bilong balus.

Jeneral Mensea bilong BSP Retail, Paul Thornton, i tok dispela patnasip i kamap gut bikos em i helpim plen bilong BSP long givim ol isi sevis long ol kastoma i ken mekim laip i kamap isi wantaim nupela teknoloji na sistem.

Bisnis woksop bilong helpim Manus ikonomi



Wanpela meri long Bisnis Woksop

I GAT moa long 150 man na meri na yut bilong Manus Provins husat i kisim pinis wanpela Smo Bisnis Woksop program we Australia Gavman i patna wantaim Manus Provinsal Gavman long kamapim.

Ol man na meri husat i pinis long dispela woksop i bin kisim setifiket bilong luksave long ol olsem ol i pinisim dispela kain skul. I bin gat tripela woksop, wanpela bilong ol lain i laik statim bisnis, narapela bilong ol lain i stap long namel na narapela bilong ol lain i gat moa save pinis long ranim ol bisnis.

Ol bisnis woksop i bin kamap insait long tripela yia, stat long 2014 na pinis long 2016. Tingting bilong dispela woksop em long givim moa save long ol man na meri long wei bilong statim na lukautim bisnis bilong ol yet. Ol i lainim tu long wei bilong wokim bisnis plen na long painim ol rot bilong bisnis, kamapim ol bikpela tingting, fainensel menesmen tul, aplai long kisim bisnis dinau, long baim ol samting bilong salim na long

wei bilong soim aut bisnis bilong ol.

Australia Hai Komisen Fes Seketeri, Dokta Fiona Crockford i tok, em i namba wan tingting bilong Gavman bilong Australia long lainim ol pipel bilong Manus long wei bilong ranim bisnis, bikos ol bai inap long givim samting i go bek long ikonomik developmen bilong kantri tu.

“Ol lain husat i kisim skul, nau i luksave long wanem kain save ol i gat long statim wanpela bisnis o long mekim bisnis bilong ol i go bikpela,” em i tok.

“Ol meri i soim wanpela strongpela bun baksait olsem ol lain bilong kamapim mani long sapotim ol yet na ol famili na komyuniti bilong ol.

“Mipela harim pinis ol stori bilong wanpela IT bisnis, wanpela gest haus, wanpela bekeri na fiul bisnis, i kamap bihain long dispela woksop.”

Manus Edministresen Fainens Menesa, Robert Siwer i tok bisnis woksop em i wanpela hap bilong 2014 i go 2017 Midium Tem Developmen plen bilong Manus long kamapim gut ikonomi sekta.

“Manus i gat liklik sans long wokim bisnis olsem na ol trening woksop olsem bai helpim moa pipel long kamapim bisnis,” em i tok.

Wanpela man husat i bin stap long woksop, Ku’ulen Hamou i givim salens long ol narapela lain i kisim skul olsem ol i mas bihainim Liklik i go long Namel Sais Bisnis (SME) polisi long Manus.

Smol Bisnis Woksop i kamap aninit long Provinsal na Lokal Level Gavman Program wantaim sapot bilong Australia Gavman aninit long wanpela bisnis developmen na ikonomik inisativ bilong ol komyuniti bilong Manus.



Ol lain i kisim trening long Bisnis Woksop long Manus.

Kundiawa/Gembogl ilektoret helpim egrikalsa



Rais na Grein Risets Asosiet Samantha Gangai i helpim Kundiawa/Gembogl MP Tobias Kulang long yusim winowa basket. Foto: NARI Nius

KUNDIAWA/Gembogl Distrik Simbu provins nau i tanim ai bilong em i go long egrikalsa bihain long ol i kisim bikpela hevi long taim bilong El Nino we i bin kamapim taim drai na ais i pundaun long ol kaikai long gaden.

Long stretim dispela hevi, Memba, Tobias Kulang, i bin go long NARI long Lae long painim aut long wanem kain egrikalsa sistem na nupela wei em inap yusim long helpim ol pipel bilong em.

Kulang i bin putim namba wan sapot mani long mak bilong K100, 000 we

bai yusim long kirapim wanpela moa skrin haus na ol iglu long NARI Aiyura bilong ol inap long kamapim planti moa sit bilong planim we

inap long karim kaikai hariap.

Mista Kulang i tok wokabout bilong em i go long NARI Lae em i helpim em long kisim moa save long wei bilong egrikalsa na em i gat strongpela bilip olsem dispela wok wantaim NARI em i stat tasol long wok bilong ol pipel i wok long egrikalsa.

“Mi lukim em i nais tru long lainim olsem yumi ken planti wanpela kaukau sit long kamapim nupela bilong planim. Mi bai yusim dispela kain disain bilong neseri na tu long putim net long rausim ol insek o binatang long kaikai ol samting bilong planti,” Mista Kulang i tok. Ol dispela risos senta bai kamapim ol pathogen kaukau na Irish poteto.

Kulang i go tu long Mommase Rijonal Senta long Bubia na toktokt wantaim Senia Sientis, Elick Guaf long wanem em i gutpela

wei bilong lukautim ol gutpela kain poteto na long givim sit i go long ol fama. Em i bin go tu long lukim ol Laipstok long Labu long save long gutpela wei bilong lukautim ol pik, kakaruk bikos ol rurel fama i save laik givim stok fid tumas long ol enimal bilong ol. Kulang i tok promis long ol opisa bilong NARI olsem em bai mekim wok bilong em long kamapim gutpela infrastraksa insait long distrik long sapotim ol egrikalsa program bai kamap

Ol komyuniti i mas gat ol kain kaikai we i no inap bagarap long taim bilong bikpela san, na long helpim ol rurel komyuniti, Nesanel Egrikalsa Risets Institiut (NARI) i wok wantaim nongavman ogenaiesen na distrik long soim ol gutpela wei planim ol samting we inap long sanap strong long taim bilong san.

Dairekta Jeneral, Dokta Sergie Bang i tok El Nino i

wok long kamap planti taim long kantri we bikpela tru i bin kamap long long 1997 na 2015 we i bagarapim ol pipel na kamapim hangre. “Wok bilong NARI em long kamapim sekuriti bilong kaikai o long mekim ol rot bilong ol kaikai bai stap longpela taim, maski wanem kain taim i kamap olsem bikpela ren o bikpela san. Mipela i gat save long wanem ol distrik we inap long kisim bagarap long ol taim nogut na mipela i wok wantaim ol NGO na ol distrik long dispela.

“Mipela laikim bai gat ol risos senta long ol dispela distrik, wantaim gutpela rot bilong wara o irigesen sistem long groim ol kaikai. NARI bai wok long ol dispela risos senta long soim wanem kain wei bilong groim na lukautim ol dispela kaikai we inap long sanap strong long taim bilong ren na san wantaim,” Dokta Bang i tok.

Maloney bai pilai faiv-eit long NSW Kantri

NU Saut Wels Kantri i makim James Maloney long pilai long posisen fait-eit long resis bai kamap namel long NSW Siti long Tamworth long Sande.

Maloney em i pilaia bilong Cronulla Sharks, husat i soim kala bilong em na Sharks i win 6-pela taim long lain.

Nau em bai pilai wantaim poro pilaia bilong em, Jack Bird, na tripela pilaia husat i gat ekspirians long Stet ov Orijin tu bai pilai wantaim.



James Maloney i go insait long Blues long Orijin namba tu.

- Tariq Sims,
 - Mitchell Aubusson
 - Clint Gutherson,
 - Leilani Latu,
 - Kyle Lovett,
 - Josh Mansour,
 - Tyrone Peachey,
 - Nathan Peats,
 - Aidan Sezer,
 - Curtis Sironen,
 - Tom Symonds,
 - Chad Townsend,
 - Jake Trbojevic
- na kosa bilong ol em Craig Fitzgibbon.
- Na, Orijin skwat bilong Siti em;
- Chris Lawrence (kepten),
 - Nathan Brown,
 - Reagan Campbell-Gillard,
 - Addin Fonua-Blake,
 - Aaron Gray,
- na Brad Fittler em i kosa bilong ol.

Parramatta i laik kotim NRL



Vai Afu Toutai bilong Parramatta Eels i rausim Michael Lichaa.

PARRAMATTA Eels i redi long kotim Nesenel Ragbi Lig long las wik taim ol i pait long taim bilong ol long pilai bikos NRL i brukim lo.

NRL i bin mekim wok painimaut bipo yet na em bai tokaut long risal bilong dispela wok painimaut long dispela wik.

Tasol, siaman bilong Eels, Steve Sharp, i

tok klap i no tok orait long toktok long wari bilong ol long ol wok painimaut ol i bin mekim bipo long ol bai mekim disisen.

Sharp i tokim NRL olsem, sapos ol i tok orait long kotim NRL em ol bai givim 28 de long ol i ken mekim sampela toktok.

“Dispela i minim olsem mipela i laikim ol long redi gut long sanap long kot,” Sharp i tok.

Referi i no wokim stretpela disisen ...Raiders i lus

KOSA bilong Canberra Raiders, Ricky Stuart, i tok Raiders i lus taim ol i pilai egensim Panthers, Cowboys na Roosters bikos referi i no mekim stretpela disisen long taim bilong resis.

“Penrith i win 19-18 na Raiders i lus taim Peter Wallace i kisim wanpela fil gol long 79 minit em referi no inap long awodim dispela poin,” Stuart i tok.

Stuart i toktok strong long taim ol i bung

long pres konpres bihain long pilai. Em i tok olsem ol pilaia bilong Panthers i mekim bainis egensim ol pilaia bilong Raiders bilong ol i bungim Wallace na pasim kik bilong em taim em i laik kisim fil gol.

“Dispela em ol i brukim lo bilong ragbi,” Stuart i tok.

“Sapos mi mekim olsem long kisim wanpela fil gol long neks wik em ol bai tok orait o nogat? Em ol bai no inap long tok orait.”



Peter Wallace i kisim fil gol.

Smith i lusim IPL wantaim bikpela bagarap

...Australia bai lukluk long Smith pas

STEVE Smith i bin lusim Indian Premia Lig (IPL) na i go long haus bikos em i bin kisim bikpela bagarap long join bilong em.

Dokta bilong Kriket Australia, Alex Kountouris, i tok kepten bilong Australia i kisim taim wantaim bikpela pen long las wik.

Ol bai lukluk long em na em bai kisim ol tritmen long haus sik bipo long go long West Indies.

“Dispela em i no bikpela bagarap em i bin kisim taim mipela i lukluk long ol infomesen bilong dokta na mipela i amamas long givim em inap taim long em bai orait bipo long go long West Indies long pinis bilong mun Me,” Kountouris i tok.



Steve Smith i pilai bilong Pune.

Leicester na Manchester i kisim wankain poin

Wes Morgan i amamas taim ol Leicester Siti i kisim wanpela poin na bungim skoa bilong ol Manchester Yunaitet, 1-1.



LEICESTER Siti i kisim wankain poin, 1-1, egensim Manchester Yunaitet long namaba wan taim resis bilong Siti long Inglis Premia Lig taitel i kamap long Old Trafford.

Ol Siti i no amamas long stat bilong pilai taim ol Yunaitet i putim wanpela gol long

naba eit minit bilong pilai.

Bihain long 9-pela minit, ol Leicester i putim wanpela gol na dispela i bungim skoa bilong ol Yunaitet.

Tupela tim wantaim i no kisim sampela skoa inap ol i bungim pinis bilong pilai.



Ramu NiCo (MCC) soim pes long DWU Open De



Ol lain raun lukim Ramu NiCo stol long DWU Open De.



Ol Ramu NiCo wok lain raun lukim ol stol long DWU Open De.

RAMU NiCo Menesmen (MCC) Ltd i soim olsem em wanpela koporet sitisen o kampani we i wok insait long Madang provins, olsem na long Sande, Me 1, 2016 em i bin stap long soim pes long Divain Wod Yunivesiti (DWU) Open De.

Dispela Open De long Sande i givim sans long ol DWU sumatin long ol wan wan akedemik dipatmen long yunivesiti long soim wanem ol samting ol save lainim. Nara-pela samting tu em long givim sans long ol bisnis haus long PNG na Madang long soim ol prodak bilong ol long bringim ap intares o promotim ol prodak na bisnis bilong ol.

Ramu NiCo (MCC) i bin stap long dispela Open De long tok klia long ol pipel bilong Madang wanem wok em i save wokim long sait long nikel/kobalt prodaksen. Em i soim ol buk na niusleta bilong en olsem Ramu Garamut long ol sumatin na ol stekholda long luksave long wok bilong en.

Insait long dispela taim nau

Ramu NiCo (MCC) wantaim ol arapela bikipela maining na petrolium kampani long wol na tu long PNG i bungim bikipela hevi long sait long wol komoditi prais i stap daunbilo tru.

Ramu NiCo tu i bungim hatpela taim stret nau long dispela taim we wol komoditi prais i stap daunbilo tru.

Long Sande, ol wokman bilong Ramu NiCo (MCC) husat i bin stap wok long stol bilong kampani i bin toksave na tokklia long ol lain husat i go long hap long posisen bilong kampani long taim nau kampani i stap long hevi.

Ol wokman i bin stori long sait long prodaksen long Kurumbukari Main long Usinobundi distrik, na tu 135 kilomita Paiplain i go daun long Basamuk Rifaineri we prosening plent i stap long hap, we i save redim ol prodak i go olsem miks haidroxaid prodak (MHP) bipo long sip i save karim i go long ovasis maket long salim.

Plantu lain i bin askim ol wokman bilong Ramu NiCo

long wanem bilong kampani nau yet bihain long wanpela birua i bin kamap long Basamuk Rifaineri hai presa esid litsing (HPAL) plent.

Ol wokman bilong Ramu NiCo i tokim ol lain olsem nau yet wok painimaut i go het yet bihain long Mineral Risoses Atoriti (MRA) i givim oda long wok long HPAL eria i stop sampela taim pastaim.


Long Sande tu i lukim Presiden bilong Ramu NiCo (MCC), Wang Jicheng i putimaut wanpela notis pepa olsem kampani nau yet i bungim bikipela salens tru taim wok i no kamap long HPAL o saspensen olsem na notis i bai go aut long tokim sampela ol wok lain long go malolo na sampela bai kampani i pinisim ol long wok olgeta.

Dispela toksave bilong Mista Wang i kamap long taim we Kampani i wok long bungim bikipela hevi long sait long fainens o mani insait long taim we saspensen i kamap na tu prais bilong nikel long wol maket i stap daunbilo tru.

Ramu NiCo (MCC) wok lain long stol long DWU Open De.



Tupela skul sumatin amamas long lukim ol Ramu NiCo niusleta.



Abip i winim TGDA sempionsip gren fainel



Kepten bilong Abip i kisim tropi long han bilong Gazebo Klap presiden, Akolo Kotange, bihain long Abip i daunim Sakups, 6-5, long TGDA sempionsip gren fainel.

ABIP dat tim i winim Tabubil Gazebo Dat Asosiesen (TGDA) sepionsip gren fainel i bin kamap insait long maining taunsip long Tabubil.

TGDA sempionsip resis i sapos long kamap long las yia, 2015, tasol drai sisen i bin kamap long las yia i bagarapim program bilong resis. TGDA i salim gren fainel resis i kam antap long dispela yia bikos ol i hat tru long kamapim long las yia.

Long Sarere, Epril 23, 2016, TGDA i kamapim gren fainel taim Abip na Sakups i resis long gren fainel. Abip i daunim ol Sakups we ol Sakups i no bin kisim wanpela skoa.

Sakups ol i namba wan long winim ol narapela tim taim pilai i stat, tasol Abip i daunim ol long tripol gem.

Bipo long go insait long singel gem, tupela i bin pilai tupela taim namel long tupela yet na tupela i winim

wan wan resis.

Long singel gem, tupela tim wantaim i stap pas, na tupela i kisim wankain poin long namba faiv gem.

Bihain long dispela, Abip i daunim ol Sakups, 6-5, na winim TGDA tropi.

Presiden bilong TGDA, Arthur Kobal, i tok tenyu long tupela tim wantaim long gutpela gren fainel resis tupela i bin pilai na i no nat wanpela birua pasin i bin kamap.

“Long Makim maus bilong Tabubil Gazebo Dart Asosiesen, mi kisim dispela taim na i tok tenkyu long sapot bilong yupela ol pipel bilong Tabubil maining taunsip long 2015 sisen we mipela i bringim i kam antap long 2016 na nau gren fainel i kamap,” Kobalo i tok.

Ol pilaia husat i kisim awod em; Dimaneng i kisim long Maina Premia, Sani Karimnok, Sakups pilaia, i kisim long MVP.

Pilaia bilong Yia bilong ol meri em Martina Walwal, Kombineisens pilaia, i kisim, na Pilaia bilong Yia bilong ol Man em Garry Saun bilong Emanon tim i kisim.

Awod bilong ol meri pilaia husat i kisim planti skoa em Martina Walwal i kisim wantaim 31 x 100 skoa na bilong ol man em Garry Saun i kisim wantaim 30 x 100 skoa.

Ol dat pilaia na sapota bilong Abip i amamas long taim bilong gren fainel wantaim ol sapota na famili memba long Gazebo Klap.



Nupela emblem i soim spoting kalsa bilong PNG

EMBLEM em i no wanpela piksa noting, nogat. Em i olgeta samting long ogenaisesen bikos em i save soim sain na velyu bilong ogenaisesen.

Emblem bilong Papua Niugini Olimpik Komiti (PNGOC) i save soim piksa bilong ol pipel bilong olgeta hap long wol i save promotim velyu bilong pis, na em i bikpela samting tru.

Dispela iven i makim 100 de bipo long 2016 Olimpik Gems long Rio de Janeiro bai stat.

PNGOC i save senisim emblem bilong em taim ol yia i save pinis bikos long makim ol wok we em i save mekim. Nau em i tokaut long nupela emblem i soim olsem nu-

pela rot we ogenaisesen i bihainim.

PNGOC em i Komonwel Gems Asosiesen (PNG CGA) bilong kantri na em i Pasifik Gems Asosiesen (PNG PGA) bilong kantri tu.

PNGOC i save stretim ol hevi bilong Olimpiks taim ol hevi bilong Komonwel Gems na Pasifik Gems em PNG CGA na PNG PGA atoriti i save lukluk long dispela.

Long wan wan gem bilong ol dispela asosiesen, ol i save makim ol etlit long makim PNG olsem memba bilong Tim PNG.

Dispela i minim olsem ogenaisesen i gat 4-pela emblem aninit long wan wan asosiesen.

“Mipela i laik senisim em-

blem bilong mipela long olgeta taim bikos mipela i laik soim olsem mipela em dispela kain lain long taim bilong gem,” Seketeri Jenerel bilong PNGOC Mrs. AuvitaRapilla, i tok.

Nupela emblem i soim stail vesen bilong Kumul (Bed ov Paradais) Nesanel Simbol bilong PNG aninit long kala bilong nesnel plak bilong kantri.

Long emblem, Kumul i join wantaim ol ples klia simbol bilong ol spoting long wol na Olimpik Ring we Intenesenel Olimpik Komiti i tok orait klostu taim.

Tim PNG bai soim dispela nupela emblem long Rio long dispela yia.



NUPELA MAK: (L-R) PNGOC Siaman bilong fan resing, Mr. Syd Yates, Mrs. Rapilla, Mr. Junior Rorosi husat i bin mekim piksa bilong pisin we i stap insait long mak bilong PNGOC, wantaim PNGOC Presiden, Se John Dawanincura i sanap wantaim long fran bilong piksa i gat ol nupela mak bilong PNGOC. Piksa: A. Molen/ PNGOC.

Mead i kepten bilong Kumuls

i kam long bek pes

Ol i no makim sampela PNG pilaia i save pilai long UK long Supa Lig na Salens Kap long dispela resis.

Sampela PNG pilaia i save pilai long NRL na ol i makim ol em David Mead na Nene McDonald bilong NRL Gold Coast Titans, Kato Ottio na Kurt Baptise bilong Canberra Raiders.

Sampela moa PNG pilaia we ol i lusim em Ray Thompson, Neville Kostigan na Stanston Albert bikos ol i kisim bagarap.

Ful taim skwat ol i tokaut em;

- 1 David Mead - Goald Titans (NRL pilaia)
- 2 Justin Olam - PNG Hunters (ISC pilaia)
- 3 Kato Ottio - Canberra Raiders (NRL pilaia)
- 4 Nene McDonald - Gold Coast Titans (NRL pilaia)
- 5 Stargroth Amean - PNG Hunters (ISC pilaia)
- 6 Ase Boas - PNG Hunters (ISC pilaia)
- 7 Watson Boas - PNG Hunters (ISC pilaia)
- 8 Luke Page - BurleighBears (ISC pilaia)
- 9 Wartopo Puara - PNG Hunters (ISC pilaia)

- 10 Henry Noki - PNG Hunters (ISC pilaia)
 - 11 Rhys Marthin - Townsville Blackhawks (ISC pilaia)
 - 12 Rod Griffin - Wests Tigers (NRL pilaia)
 - 13 Adam Korave - PNG Hunters (ISC pilaia)
 - 14 Adex Wera - PNG Hunters (ISC pilaia)
 - 15 Brandy Peter - PNG Hunters (ISC pilaia)
 - 16 Willie Minoga - PNG Hunters (ISC pilaia)
 - 17 Kurt Baptise - Canberra Raiders (NRL pilaia)
 - 18 Timothy Lomai - PNG Hunters (ISC pilaia)
- Kosa: Michael Marum.

Hunters i stap namba tu long lada

...Zeming i aut long PNG LNG Kumuls seleksen



Noel Zeming i ran strong long putim namba tri trai bilong ol Hunters. Zeming i winim prais bilong ol pilaia i save pilai gut long taim bilong resis.

Philemon Tame i raitim

PAPUA Niugini SP Hunters i stap namba tu long lada bilong 2016 Intras Supa Kap resis, bihain long ol i daunim ol Redcliffe Dolphins long raun namba 9.

Ol Townsville Blackhawks i stap namba wan long lada wantaim 15 pons na Hunters i bihainim ol wantaim 14 pons. Ol Hunters bai stap sambai long raun namba 10, tasol planti pilaia bilong Hunters bai pilai long Pasifik Tes resis long taim ol bai stap

sambai long dispela wiken.

Tasol, ol i no makim Zeming long seleksen bilong PNG LNG Kumuls long pilai egensim ol Fiji Bati long Pasifik Tes resis.

Zeming i tok em i no amamas taim ol i no kisim em insait long tim tasol em i stap wantaim bel isi na lukluk long resis bilong Hunters.

Em i tok wok redi bilong raun namba 9 pilai egensim ol Redcliffe Dolphins long wiken em i strong tumas bihain long ol i makim ol skwat bilong Kumul we planti ol pilaia bilong Hunters em ol i bin makim.

Ol i makim 11 pilaia bilong Hunters na ol pilaia em Justin Olam, Stargroth Amean, Ase Boas, Wartovo Puara Jnr, Adam Korave, Adex Wera, Brandy Peter, Timothy Lomai na Edward Goma.

Long raun namba nain resis, banis bilong SP Hunters i strong tumas na ol i kam aut wantaim 22-18 win egensim Redcliffe Dolphins long Nesanel Futbol Stediam long Pot Mosbi long las wik Sande afinun.

Ol Hunters i wokabaut tu wantaim Stan Joyce Kap long wankain taim.

Pilai i stat na pul bek bi-

long ol Hunters, Stargroth Amean, i putim namba wan traime bilong ol Hunters na Ko-kepten bilong ol, Noel Zeming, i kikim bal namel long tupela gol pos na ol i stap pas, 6-0.

Pilai i kamap strong tasol tupela tim wantaim i mekim planti asua taim ol i ronim bal.

Ol Dolphin i rausim strong bilong ol Hunters na ol i bin bungim skoa bilong ol Hunters, 6-6, taim Rulong Nutria i putim namba wan trai bilong ol Dolphins.

Long namba tu hap bilong pilai, kala bilong ol Hunters i sain gut tru we hap-bek, Ase Boas, i pasim bal i go long Adex Wera long putim namba tu trai bilong ol long raun namba nain resis. Zeming i abrus long dispela taim long putim bal i go insait long gol pos na ol i stap pas wantaim 10-6 poin.

Bihain long dispela, Zeming i painim wanpela rot long banis bilong ol Dolphins na i ran inap planti mita na putim trai aninit long tupela gol pos. Em i kikim konvesen long trai bilong em yet na i skruim skoa i go antap long 16-6.

Ol Dolphins i no larim ol Hunters i go pas yet we prop

bilong ol, Faingaa, i brukim trai lain na skruim skoa i go antap na bihainim ol Hunters yet, 16-12, taim Luke Capewell i no abrus long putim bal i go insait long tupela gol pos.

Zeming i soim stail kala bilong em long skruim moa yet long ol skoa bilong ol Hunters. Em i kisim bal taim ol Dolphins i kik na i ran moa long 70 mita long putim namba foa trai bilong ol Hunters. Em i yusim wankain lek bilong em long kisim tupela poin na ol i stap pas yet, 22-12.

Wantaim 7-pela minit i stap yet na ol Dolphins i bung gen na bekim traime bilong ol wantaim stail kik bilong ol i bring skoa i kam antap klostu long ol Hunters, 22-18.

Zeming i winim prais bilong ol pilaia i save pilai gut long taim bilong resis. Hunters i bihainim ol Townsville Blackhawks na i stap namba tu long lada.

Risal bilong ol Hunters inap long raun namba 9 bilong 2016 intras supa kap resis em ol i bin lus long raun namba eit na raun namba foa, tasol 7-pela raun olgeta em ol i win.

Risal i sanap olsem;

Raun	9	PNG Hunters 22 - Redcliffe Dolphins 18
Raun	8	Burlieh Bears 20 - PNG Hunters 18
Raun	7	PNG Hunters 38 - North Devils 22
Raun	6	PNG Hunters 11 - Blackhawks 10
Raun	5	PNG Hunters 34 - Cutters 20
Raun	4	Falcons 28 - PNG Hunters 20
Raun	3	PNG Hunters 20 - Tweed Head Seagulls 18
Raun	2	PNG Hunters 24 - Wynnum Manly Seagull
Raun	1	PNG Hunters 36 - South Logan Magpies 18

Tupela Kassman i kisim medal



Samantha na Maxemillion Kassman i soim Trukai Fan Ran snot ol oksen long Pot Mosbi sampela mun i go pinis. Piksa: Wantok Pail

TUPELA Kassman, Maxemillion na Samantha, husat i Papua Niugini Taekwondo etlit i winim medal taim tupela i go insait namba wan taim long Sydney Taekwondo Festival.

Nau tupela i redi gut long kamap namba wan Taekwondo etlit long Osenia rijon taim Maxemillion i winim Gol Medal long 63kg pait bilong em.

Na, Samantha i no laki long golden poin na em i winim Brons long 67kg hevi weit salens bilong ol meri.

Tasol, Max i kam aut long 68kg Feather-

weit divisen bikos em i kisim bagarap na Samantha i pait strong inap las minit taim emgo daun long golden poin.

“Ol wik we mipela i mekim wok redi i kamap gutpela tru na mipela i soim gutpela kala stret long go pilai long ol bikipela resis nau,” max na Samantha i tok.

Sydney Taekwondo Festival em i namba resis bilong ol hai pefomens spering divlopmen taim em i opim dua bilong Max na Samantha long makim Tim PNG long go pilai long Rio Olimpik Gems.

Nesanel Sempionsip bai kamap klostu taim



Ol yangpela meri i resis long 3000 mita resis bilong ol meri. Ol i trening long Sir Ignatius Kilagen Stediam long resis long Nesanel Sempionsip resis bai kamap long Betde bilong Kwin.

ETLETIK PNG i tokaut olsem Nesanel Sempionsip resis bai kamap long betde bilong Kwin long Jun 10 inap long Jun 12 long Sir Ignatius Kilagen Stediam long Lae.

Resis bai bihainim wankain taim tebel olsem ol i save pilai long ol yia i go pinis. Pilai bai stat long Fraide apinun wantaim 10 000 mita fainel resis bilong ol man , 5000 mita

fainel resis bilong ol meri, 400 mita na 800 semi fainel resis long open na anda 18 divisin bilong ol man.

I gat 7-pela iven tasol ol i makim anda 16 wantaim 100 mita, 200 mita, 400 mita, 800 mita, long jump, hai jump na javelin.


Ol anda 14 em ol bai resis long sprinting resis long 100 mita, 200 mita na 400 mita.




Mangi Rabaul i kam ya; Gurais pialai i strong tumas na ol Mendi Muruks i bungim em. Gurias i daunim ol Mendi.



Hunters i strong yet; Namba wan pilaia bilong ol Hunters, Adex Wera, i daip long trai lain na putim trai.



Mangi asples ya, yu laik i go we; Hunters pilaia i holim strong pilaia bilong ol Redcliffe Dolphins i laik brukim banis bilong ol.



Mangi Hunters ya; Noel Zeming i putim trai bilong ol Hunters long wankain taim, Wera i putim trai, long Poto 2.



Noel Zeming i winim prias bilong ol pilaia i save pilai gut long taim bilong resis. Em i kamap namba wan pilaia bilong ol Hunters taim ol i pilai wantaim ol Redcliffe Dolphins long las wik Sande.



Ol meri i resis long 5000 mita resis bilong open divisin bilong ol meri long Sir Ignatius Kilage Stediam long Lae. Dispela resis em ol trening bilong Nesanel Sempionsip resis bai kamap long Betde bilong Kwin long Jun 10 inap 12.



George i ran pas long ol narapela elitit taim ol i trening long Sir Ignatius Kilage Stediam bilong pilai long Nesanel Sempionsip resis long Jun 10 inap 12.



DIANA Tuna

Niupela Swit Teist
Nau Igat Moa Oil!

PNG's ORIGINAL TUNA

Manufactured by:
RD TUNA CANNERS LTD.

Mead i kepten bilong Kumuls



Piksa em i opisal PNG Kumuls tim poto bilong pilai long Pasifik Tes resis egensim Fiji Batis long dispela wik Sarere.

Baksait L-R: Solomon Kulinsai (Trena), Marcus Bai (Tim Menesa) Edward Goma, Watson Boas, Stargroth Amean, Timothy Lomai, Stanley Tepend (Opisal).

Namel L-R: Leonard Tarum (Opisal), Henry Noki, Luke Page, Nene McDonald, Kato ottio, John Wilshere (Asisten Trena), David Westly (Asisten Trena), Arnold Kerewanty (Tim Menesa).

Fran L-R: Wartove Puara Jr, Kurt Baptiste, Brandy Peter, Justan Olam, Willie Minoga, Michael Marum (Kosa), David Mead, Adam Korave, Ase Boas, Adex Were, Rodney Griffin.

KOSA bilong PNG LNG Kumuls, Michael Marum, i tokaut olsem, namba wan poin skora bilong Gold Coast Titans, David Mead, bai kamap kepten bilong PNG LNG Kumuls long Pasifik Tes resis bai kamap egensim ol Fiji Bati long Pirtek Stediam long Paramantta long dispela wik Sarere.

Pilai bai stat long 5.30 apinun long Sarere na ol lain PNG husat i save stap long Sydney bai i gat taim long go lukim ol Kumuls long hap bilong pilai long Fonde 3.30 inap 5.30 apinun, sapos sampela i tingting long go lukim ol.

Kosa Marum i tok, "David em i wanpela senia pilaia i stap long sait bilong Kumuls wantaim bikipela ekspiriens bilong em long NRL we em

i save pilai long Gold Coast Titans long 2009 inap nau, na mi gat strongpela tingting olsem em bai go pas long ol Kumuls long pilai egensim ol Fiji.

"Mead i makim PNG long 2008 Wol Kap resis long Australia na 2013 Wol Kap long Ingran."

Mead i tok, " Mi winim wanpela mak long pilai bilong PNG, tasol mi

gat bikipela amamas long go pas long ol Kumuls.

"Mi tok tenkyu long Michael Marum bilong em i makim mi long go pas long Kumuls na mi bai soim olgeta kala bilong mi long givim ol PNG."

Samoa bai pilai egensim ol Tonga bihain long ol PNG na Fiji. Australia bai pilai egensim ol Nu

Silan long Fraide.

Skwat bilong ol PNG Kumuls em planti i kam long PNG Hunters. PNG-GRFL i makim 10-pela PNG Hunters pilaia na sampela ol man PNG i save pilai long Australia tu.

ridim moa long dispela stori long pes 25



PMV DIESEL OIL

PMV OIL BILONG YUMI

BOROKO MOTORS

PORT MORESBY	325 5255
LAE	472 1144
MT HAGEN	542 1933
TABUBIL	649 9048
KIMBE	983 5035
MADANG	422 2659
KOKOPO	982 8193
GOROKA	532 3552

Email: info@borokomotors.com.pg
Website: www.borokomotors.com.pg